

本朝分省人物考

人物考卷之一百六目錄

陝西臨洮府

毛忠

石執中

趙安

王竑

黃諫

段堅

彭澤

劉漳

葛廷章

慶陽府

景清

党理

孔文英

張驥

韓鼎

李夢陽

延安府

郝志義

劉仕

張文奎

馬汝驥

附

綏德衛  
寧夏衛

慶陽衛  
涼州衛

紀溫

陳震

王誌

附孫琦

鄒昊

張嘉謨

楚書

吳克忠

張達

本朝京省人物考卷之一百六

陝西臨洮府

慶陽府

延安府

綏德衛  
寧夏衛

慶陽  
涼州衛

毛忠

毛忠字允誠祖諱刺國初率衆歸附隸籍蘭州洪武  
丙辰歿于王事考諱寶以雄勇收捕沙州叛寇甲午  
集衆隨 駕北征授昭信校尉永昌衛百戶忠少膺  
力絕人善騎射年二十代父領兵進征寧夏至賀蘭  
山後擒番王也先于并部衆馬駝以歸永樂宣德間  
數從征北虜多戰功累陞指揮同知賞賚有加正統  
丁巳陞甘州右衛操備戊午虜擁衆寇邊從平虜大

總兵蔣公征勦追至兀魯乃遇敵當先交鋒以七騎  
破陣奇功陞昭毅將軍陝西行都司都指揮僉事賜  
以白金文綺壬戌哨巡沙州繕修城堡邊民賴之甲  
子巡迤北天倉毛日等處乙丑正月 朝廷念其勲  
績賜勅獎諭加陞都指揮同知仍舊操備丙寅哈密  
使臣朝貢歸過赤斤掠沙州罕東等地大集渠魁諭  
以恩威虜卽羅拜悔罪盡還其所掠時聞沙州都督  
喃哥偕弟謀內寇忠峴之廉得其實遂擒番僧加失  
領真等械送京師復領兵往沙州收捕喃哥等千二  
百人事聞陞都指揮使且有白金文綺之賜戊辰三

月奉勅征進罕東等處夜集虜營生縛僞祁王鎖南  
奔并部下二百餘人招降沙州等處土達七千餘人  
陞右軍都督府僉事乙巳哨接叅將劉震軍馬至半  
截墩遇敵奪獲被虜人畜甚衆勅充右叅將鎮守甘  
肅景泰庚午領兵繕修高臺城堡堅完有蒲人甚賴  
之一日令男佺赴京奏事蒙特授佺百戶令齎勅回  
諭父子務在同心協力盡忠報國時英廟出狩虜  
廷忠前所獲奸僧加失領真因得不死遂投虜也先  
以師事之適朝廷遣禮部侍郎李實爲通好計至  
則奸僧加失領真欲圖復仇中忠竒禍因設問以告

李實實遂以其言歸報忠將獲罪而甘之內外守臣  
及其邊人俱爲訟寃 朝廷亦知其僞置之不問適  
福建賊起命忠馳往協守居閩七年 英廟復辟卽  
日召忠于閩陞都督同知賜白金三十兩紵絲二表  
裏慰勞有加時忠以勤勞膺疾 上遣太監賜羊酒  
藥物及日遣御醫診視疾愈入謝 上思甘涼爲西  
北重鎮乃命協同總兵西寧侯宋誠鎮守迨行前一  
日召至文華殿 玉音下詢防邊之策應對咸稱旨  
上嘉嘆良久從容諭之曰卿爲國老成舊在西陲民  
情土俗諳練有素此行當宣布 朝廷威德加意撫

輯人民俾知感恩報國遇有調發必得其用毋致乖  
違有負委任之重諭畢上親授以玉帶明日陸  
辭復賜白金織蟒尋召至文華殿面諭丁寧再賜寶  
錠蓋上在虜廷時極悉奸僧之間而益信其忠誠  
故恩遇之隆如此九月領兵昌寧等處截殺隄備策  
應涼州哨至板井寇聞忠威名皆遁去明年戊寅  
上遣使就鎮賜明甲鳳翅盔繡刀以壯軍容仍降勅  
獎諭忠受恩感激每征伐罄竭心膂務圖成功五月  
永昌西石門六月山丹寺甜水湖七月花寨寺溝凡  
三戰皆大捷擒斬賊衆并奪獲人畜軍器不可勝紀



已卯正月陞右軍左都督仍舊鎮守忠威望素著中外畏服所過略無梗阻辛巳正月虜酋孛來擁衆寇莊浪與總兵宣城侯衛穎分兵追擊之擒斬賊衆奪獲戰馬軍器人畜賊勢少却隨領騎士三千於涼州十二里鋪墩安塘衆方集適賊騎數萬突至嚴督將士併力拒敵自黎明至次日晡時士皆殊死戰凡百餘合賊應弦墜馬者不計其算賊遂解去全師而還八月虜寇永昌屢截殺或夜劫營壘以撓之斬獲首級戰馬軍器并奪回男婦三百餘牛羊驢騾以萬計捷奏進爵爲伏羌伯食祿一千石協守如故成化戊

子陝西固原州土達滿四叛聚衆萬餘據石城砲架  
山震驚關陝其山七峰陡峻前此官軍追勦每失至  
是奉勅以行遂率甘涼兵馬與總督項公會行遇賊  
迎戰以騎二百餘人衝陣至砲架山截山奪險敵後  
哨至賊已大敗與孫鎧督我軍乘勝直搗七峰山上  
老稚皆號泣奔走功垂成忽昏霧起賊遂乘風盡抽  
餘黨以死決戰顧謂孫鎧曰勢急矣我受高爵厚祿  
職在滅賊勢不與賊俱生鎧亦顧衆曰我君我祖在  
上寧與賊同死遂首騎破陣以進孤軍相持自己至  
酉陣凡十餘合射矢皆盡拾賊矢射亦盡忠遂中流

矢鎧前翼救仍奮馬殺十餘賊賊執鎧斷其指裂其額曰爾復能射否忠亦赴救死之是月十一日也夜半風起折旗拔帳營中士卒皆聞甲馬聲幕下卒王寬夢忠曰我必將滿四馬上活活擒來旣覺驚愕御史鄧公本端隔帳聞之卽起焚香祝曰公果有靈能助我擒賊當爲具奏立廟祀之未幾滿賊就擒伏誅訃聞 上震悼且曰毛忠奮勇殺賊忠義可嘉其與葬祭給麻布一百疋齋糧一百石造塋域明器錫以鐵券贈伏羌侯謚武勇食祿一千石子孫世襲伯爵

石執中

石執中蘭州人長身美髯永樂中爲刑部主事讞獄平允累官山東右布政使直而不華勤而能慎後官至浙江左布政使以老致仕卒

趙安

趙安狄道人謀勇過人永樂中屢立戰功歷陞指揮宣德正統中守鎮涼州數平羌寇陞右軍都督同知充副總兵又征北虜進封會川伯

王竑

王竑字公度陝西河州衛人正統四年進士授戶科給事中十四年英宗北狩景皇帝以郕王監國

廷臣伏闕劾王振錦衣衛指揮馬順叱衆令起竝奮  
臂捽順髮嚙其肉百官爭捶順死由是正氣直聲震  
于天下已而北虜犯順陞都察院右僉都御史督軍  
守居庸等關事平巡撫淮揚兼總督漕運官軍畏服  
久之陞左副都御史天順元年 英宗復辟石亨張  
軌論其擊順罷爲民四年起復仍原職征平涼等處  
虜寇七年復督漕運八年 憲宗登極用科道論薦  
陞兵部尚書時兩廣出師上勦賊安民事宜多見采  
納薦韓雍爲都御史總督軍務雍方補外衆議不協  
竝力爭曰此事非雍不可後果克成功薦修撰岳正

給事中張寧黃清不聽遂移疾 憲宗不許命醫往  
視章三上乃許病痊復起不數月而去尋致仕後科  
道累章論薦竟不起卒年七十五賜葬祭如例竑剛  
毅明斷臨事勇于必爲未嘗擇利害爲趨舍故累見  
沮抑而人惟恐其不用然用之不合卽去其守正不  
阿夷險一節一時論大臣如竑者蓋無幾矣

### 黃 諫

黃諫字廷臣其先揚州府高郵州人洪武初以富民  
坐法徙置陝西蘭州幼有異質讀書績文不煩師友  
程督日有進詣時蘭州尚爲縣選充縣學生 朝廷

編輯四書五經性理大全書頒之學宮士未能盡見  
諫手錄誦讀沈潛有得老宿莫能窺其際正統壬戌  
賜進士第三名授翰林院編修讀中秘書益遂景泰  
五年上饒歌鼓吹曲詔付史館七年同少卿劉儼主  
考順天鄉試時大學士陳循子瑛王文子倫俱不第  
遂構陷考官賴大學士高穀覆試獲免秩滿轉左春  
坊左中允兼編修天順初改尚寶司丞仍兼翰林院  
編修久之擢尚寶司卿充經筵講官音吐明暢多所  
規益同考會試所取號得人 英廟復辟嘗與議諫  
不自言人亦無知之者使交南始定賓主之禮王初

怒其抗欲有以汙之諫風節凜凜卒不敢犯比歸遺之厚贍却不受交人益服之未幾英廟敦尚文治特擢翰林耆宿八人進本院侍講學士五年忠國公石亨事敗言者以同鄉概論之謫判廣州府人謂非所宜處諫曰官無內外大小皆天職也吾盡職耳公餘以其學淑廣之士發部擊蒙造就者衆廣人爲建學士亭尋被誣逮繫至京道卒喪舟過淮故兵部尚書河湟王公度方總漕於茲甚切慟悼見其子幼家貧遙遙旋視無所於資歎曰季札葬其子贏博之間孔子以爲合禮况諫高郵人也何必西歸乃卜淮城



之東吉壤葬焉以其子琳爲郡庠生撫教備至諫性  
質粹美儀規清潤博涉諸經子史百家之書爲文根  
極理致尤工於詩兼善書工古隸篆傍及宋元畫吮  
毫運思一一臻妙能對鏡寫真通達國體留心世務  
志崇風教過河南澠池拜月川曹先生祠詢知分教  
霍州謝世遂流葬於彼曰狐死首止霍之弟子固不  
忘其師月川之靈獨不思故鄉乎乃捐已資屬邑令  
遷葬故里月川名端始倡性理之學于中州所著太  
極圖解諸書河東薛文清公實紹其傳故諫尊信之  
成化間 憲廟以兩朝講官恩官其子琳爲中書舍

人歷陞吏部驗封司員外郎供事內閣卒所著有使南稿南坡集書經集義從古正文月令通纂傳于世

段堅

段堅字可久蘭州人生而剛方早年讀書卽知由正學希聖賢人以伊川擬之中景泰甲戌進士天順己卯知山東福山縣修政治隆道化刊布小學令邑人講誦敷申五教諭以詩書福山地僻俗陋於是翕然丕變海邦島嶼颯颯乎絃誦之風焉旣四載陞萊州知府壤接福而俗等政教一如治福者召譙郡縣及學政屬賦詩啓諭勉振事用未朞萊人大化以憂去

服闋除南陽屬吏被化感奮思體國勤民視萊更加  
病近世以讀書媒利祿階富貴士鮮志聖賢之學乃  
倡明周程張朱與古人爲學之意召郡學及屬治諸  
生親授講說士志行勃然以變自茲鳴世者輩出又  
以民俗之偷由未預教乃取屬治童蒙及其良心未  
鑿剏志學書院教之刊小學孝經論語崇正辯文公  
家禮教民俗言諸書授之講習又於書肆收儲五經  
性理大全剏刊二程全書俟有志者給授百姓習聞  
薰液純實同性禮讓同俗逾世而風猶存又剏節義  
祠取烈女傳論祀有差自是母修婦道閭閻可觀其

爲政持大體不立赫赫之威不急功利凡所恩措  
模遠大而毀譽榮辱無一動心其勁節直氣勢力莫  
抵而抑強豪去貪剝察民隱逐巫尼疏冤獄謹庫藏  
輕徭薄賦與民休息郡人戴之如父母其敬畏之至  
若家有一段太守者然惠澤究下以直道不能取悅  
于上竟不得大用致政歸郡城與過屬地攀泣不忍  
舍卒于家郡人聞訃無弗泣下者遂作木主于志學  
書院之企德堂祀以少牢後四十年郡人思其德澤  
又別立廟以祀有容思集栢軒語錄行于世蓋其學  
本河東薛文清公承伊洛之傳故見於治行者如此

祭酒王鴻儒議曰使南陽之人知有正學而不知有俗學知有王道而不知有伯道知有關雎麟趾之化而不知有桑間濮上之風皆自堅始也子曰炅以進士爲翰林檢討

彭澤

彭澤字濟物號幸菴蘭州衛人成化癸卯舉人弘治庚戌進士歷官刑部主事員外郎真定府知府累遷左都御史兵部尚書自少有聞長益好學平生書不釋手守真定時郡有巨璫竊政或諷以當附之澤具一棺于堂後曰吾身豈附人者哉儻不測則附諸棺

矣巨璫卒不敢怒所至征討克捷霸州劉六劉七起  
羣盜前後官捕之不勝澤有文武材略聚衆至數萬  
人詔左都御史馬中錫討之中錫儒緩好名下教招  
撫劉六等陽若爲就招者兵遂撤而陰與其黨楊虎  
齊彥名益縱馳突中錫 詔逮下獄瘦死而陸完進  
右都御史假節用軍興法得誅二千石以下完乘傳  
驅至臨清遣副總兵馮禎等襲楊虎于宋門店龍化  
集大破之尋又鏖戰于裴子巖斬首二千俘獲亦衆  
而賊分兩路由蒙城太行流劫入河南境者尤狠暴  
于是澤同咸寧侯仇鉞帥秦兵擣之澤爲人長大腰

帶十二圍其顧盼燁如也平居鮮笑容雖與爲偶語  
叱叱聲若詈至則大陳軍容擐甲引見諸大校責以  
退縮顧軍正急行法建燾諸大將無不惕息皇恐頓  
首請自效良久乃釋遂鼓行前薄賊凡數十戰皆大  
破殺擄以萬計趙鏐劉三死於陣於是給事御史上  
言河南賊平下 詔切責完懼日夜督諸將徼賊而  
賊隨軼隨脇聚燒運艘掠臨清邳徐而下犯淮安又  
奔登州海套完以宣大鐵騎及中土材官良家子悉  
集合圍賊大敗之盡殘于通之狼山還朝完澤俱加  
太子少保右都御史予世襲錦衣千戶時蜀盜藍廷

備鄴本恕復起勢愈熾 詔澤充總督討之澤悉兵  
破賊衆遁竄山寨多伏弩菁棘中澤分兵出入奪水  
道度窘開一面縱兵誅之且盡澤還加太子太保虜  
萬騎入宣府大殺掠吏民將轉寇近地 詔澤出提  
督三關二路久之虜退仍理都察院澤好因酒使氣  
時時出兵書王瓊上嬖人錢寧挾威公卿咸俛首折  
節澤切齒不能平瓊因寧遣所親近語事邀澤飲澤  
醉嫚罵朱寧瓊謂澤曰勿妄言澤益奮不復可止寧  
大怒會哈密城及金印爲土魯番所取 詔諭還不  
可且謀得將寇甘肅狀僉推澤經理之澤調寧夏兵



自遣使詣土魯番予贈幣二千銀榼一盂求和還哈  
密及城土魯番陽許澤輒奏事平乞骸骨澤歸而土  
魯番變矣薄肅州芮寧全軍沒瓊條澤死罪錢寧欲  
從中下賴閣臣力揅乃免嘉靖初徵拜兵部尚書以  
老加少保致仕卒

劉 漳

劉漳陝西蘭州人以邊功得給祭葬少穎敏居官廉  
直所在有聲戊戌遼東兵變遏亂賑饑全活甚衆後  
復平邊孽盡伏遼人思其功祠之

葛廷章

葛廷章字朝憲蘭州人少負奇穎潛心墳索嘉靖丁酉中陝西鄉試戊戌連舉進士授行人奉詔列藩守法惟謹忠勤清亮名蓋哀然起也辛丑選戶科給事中敷奏詳核規諷明讜其彈撻務持大體不喜攻訐巡察內庖裁革冗靡尤多甲辰出守鳳陽郡歲大祲羣盜蜂起衆方議撲滅之術曰此良民也特奪於饑寒耳遂懸榜境內曲示禍福郡盜各警懼引去境內始安於是計口多寡發粟賑貸饑民多所全活其子女散鬻者往往捐俸收贖樂聚如初蒞任三載訓農勤學興滯剖壅百廢具舉治行稱最帑庫羨積一無

所點數至累萬盡解民部大助邊餉丁未陞江西按察司副使分道南昌南昌簿牒填委訟獄詭健防範既精判決尤慎奸欺內息請謁外屏以故疑讞競白平反無冤然文非深刻政皆簡重人莫不畏而愛之既抱疾偃牀猶批駁如素卒正襟危坐順命而化稟性沉毅守已端恪孝弟成于閨庭仁卹達于姻黨且爲政不苟律下孔嚴入仕十年所在以公清得譽旣去而人莫不思之比於漢之何武焉

慶陽府

景清

景清慶陽真寧人洪武二十七年進士第二人初領鄉薦游國學同舍生有秘書清請之不肯與清固請請以明日卽還而書生旦往索書清曰吾不知何書吾未嘗假書于汝生忿怒訟之祭酒清持書往見祭酒曰此清所誦書卽誦書徹卷問生生不能誦一詞祭酒叱生生退清卽以書還生曰吾以子珍秘太甚故相戲耳清初赴舉時過宿淳化主家主家有女爲妖所憑是夜清在而妖不來女詰之曰吾避景秀才

清也女以告父父追及清語之清書景清在此四字  
令歸粘其門妖遂絕清試禮部第三錄詩書二經入  
翰林三載改監察御史三十年春召見嘉其才命署  
都察院左僉都御史與實俸出川陝巡察私茶建文  
卽位擢左都御史改御史大夫 文皇繼統方孝孺  
練子寧等都死而清獨委蛇侍朝人以其素頗疑之  
一日早朝清緋衣入先是星者奏文曲犯帝座甚急  
文皇已疑清及朝清獨著緋遂收清得所帶劔不屈  
而死是夕精靈迭見族其家已而時入殿庭爲厲又  
命鑑

六鄉轉相攀染謂之瓜蔓抄村里爲墟

党理

党理真寧人洪武丁丑進士任宜陽縣丞以經術飭吏事政通人和境内以治永樂初累陞太僕少卿

孔文英

孔文英字世傑系出宣聖之裔陝西安化人中永樂十五年鄉試登辛丑科進士宣德元年初治江西廬陵縣未幾以事至京師擢任監察御史三年累奉璽書巡視北直隸民瘼事訖條奏所以消弭之方大荷寵賚值浙江黃岩有健訟者構捏齊民三千人相聚譸張爲非奉勅諭俾往體量鞠問至則取其文狀

究察端緒所自起遂得其所以構造者皆羅織之詞  
一訊衆情皆服立遣註連之衆獨械首訟一夫來京  
處治人皆交口以明果稱之十年丁內艱正統紀元  
奉詔清理江西軍伍九年滿考陞支五品俸仍理前  
事正統五年陞湖廣按察使丁外艱部屬軍民狀其  
生平之績相率訴御史乞留御史會奏得旨報可奪  
情起復蒞事後以事至京師景泰紀元陞大理寺卿  
奉勅鎮守紫荆關及提督緣邊軍務至則練兵有  
法設險有要弛張得宜關備大飭内外晏然無警軍  
民皆得以樂生興事六年春陞刑部左侍郎次年二

月卒于官詔如例遣官諭祭修墳安葬

張驥

張驥安化人宣德中領鄉薦拜監察御史激揚有聲  
遷大理寺少卿山東飢民相扇思變驥受命安輯卒  
于官

韓鼎

韓鼎字廷器合水人辛丑登進士第乙巳選爲禮科  
給事中丁未孝宗嗣位首陳公銓選經財用嚴兵  
衛崇天道四事尋差陝西寧夏二鎮給散官軍賞賚  
能盡革侵漁之弊由是人沾實惠戊申遷右給事中



時西夷貢獅所過騷然上疏言 陛下初政放珍禽

異獸天下聞而頌之今未踰年而納此貢恐無以示

信于民宜罷遣之又以 皇嗣未廣爲憂上言禮

天子一娶十二女以廣儲嗣大本也今舍是弗圖乃

信邪說建設齋醮將以徼福不已惑乎 上感其言

優詔答之進左給事中太常卿丁永中少卿蒙以祺

俱以黃冠起家會神樂觀董素雲竊祭服售人事覺

因火其藏以滅跡永中等庇素雲以災聞鼎請明正

其罪且乞用文學之臣以充太常庶知法守素雲乃

下 詔獄衆論快之親藩將行婚禮 詔給淮鹽一

萬引爲助上言凡賜鹽須遣中使支鬻因多市私鹽  
舟艦塞江官莫敢問鹽法且大壞請令有司給價與  
之便 詔如其言是時四方奏報災異甚多 上懼  
撤樂減膳詔百官修省言缺失乃陳謹大要堅大信  
崇節儉簡大臣重藩臬五事明年辛亥又上明正學  
遵舊制抑異端三事復因星變極陳時弊指斥貴近  
無所回互且乞遍覽羣臣章奏言有理者悉施行之  
上皆嘉納擢通政司右叅議乙卯應 詔陳言有克  
實心以消天變清軍匠以省軍儲正服舍以革僭越  
抑豪右以便商民數事言亦剴直調南京尚寶司卿

改南京通政使司左叅議庚申擢右通政駐平安鎮  
督理河道申明禁例不爲貴勢所奪又置朱家淺等  
閘使水有節縮濬汶上萊蕪諸家泉及淤河運舟賴  
之堤南旺湖以障汎濫民得耕種其湖內田流徙復  
業乙丑擢通政使督理柴薪於易州厰盡剔宿弊完  
逋薪一千七百萬有奇以母憂去職服除遷戶部右  
侍郎遂引疾致仕旣歸脫略邊幅日與親識觴咏爲  
樂鄉人益敬重之後生被其接引者皆自以爲得所  
歸依不忍去正德乙亥卒年七十九鼎爲給事中遭  
際 聖明言輒爲上所用天下多稱其賢嘗謂言官

進言宜切時弊證以先王之法酌之中道庶有裨於  
治其考績當以所言事關國家大計者多寡爲殿最  
不當叙文書出納爲勞又謂攻君之過不若養君之  
德諫官言事當在經筵進講後識者以爲名言蒞官  
所至皆著能聲而平安惠政尤多民思之爲立生祠  
云所著有斗菴集一卷尚寶司實錄一卷慶陽府志  
十卷藏于家

李夢陽

李夢陽字獻吉陝西慶陽人也母夢日墮懷中寤而  
生故名年十八舉鄉試第一明年弘治癸丑舉進士

丁內外艱戊午授戶部主事倡爲古文辭以變衰陋  
斷自秦漢而止六代以下勿論也乙丑進員外郎外  
戚壽寧侯張氏怙寵驕縱開張皇店奪民庄田聲焰  
薰灼莫敢問獨上疏論語侵中官 昭聖大怒 孝  
廟不得已下錦衣衛獄拷掠詰責辭氣無所撓 孝  
廟坐文華殿召見大學士劉公健李公東陽謝公遷  
問李夢陽宜何如劉公叩首對曰夢陽狂直不足深  
罪 孝廟變色李不敢對叩頭叩頭而已謝公從容  
對曰李夢陽雖狂然其心無他實欲効忠于 陛下  
孝廟曰謝先生言是有 旨夢陽復職一日 孝廟

獨召見兵部尚書劉公大夏問曰日來外間事何如  
對曰近釋李夢陽中外歡呼 聖德如天地之大  
孝廟曰初下夢陽獄中人皆勸朕杖之其意實欲殺  
夢陽以快中官之怒使朕負殺直臣名其不忠如此  
朕故釋之劉公曰 陛下此事卽堯舜之心也正德  
改元丙寅進郎中太監馬永成劉瑾等蠱亂朝政給  
事中劉蔭陶諧相繼論奏而大臣未有言者戶部尚  
書韓公文日流涕憂憤夢陽進曰大臣同國休戚此  
而不言焉用彼相韓公慷慨曰吾當言言而獲罪報  
先皇帝于地下耳乃令草奏之疏入 詔廷議其事

而八人者環哭 上前乞命事中變瑾遂召入司禮  
監而中官王岳范榮皆竄死明年丁卯大臣多罷免  
瑾知韓䟽實夢陽手草也蓄憾不已矯旨奪劉公健  
等四十八人官放歸田里榜爲黨人夢陽與焉然瑾  
必欲殺之又明年戊辰矯旨羅織其罪械繫逮京師  
再下錦衣獄內弟左國王者間行徒步上書康狀元  
海勉以大義賴力救得免放歸大梁庚午瑾敗辛未  
起江西提學副使振起古學力變宿習褒獎義節訓  
正禮俗士翕然向風時宸濠懷逆招致文學凡吏江  
西有材名者卽啗以厚利否則威劫之以夢陽有大

名折節下之初不爲動久之墮其術中而不知也旣  
材高負氣不肯同流俗人人多忌之而江御史某素  
有嫌遂相奏訐 天子命大理卿燕忠體勘下廣信  
獄摧苦殊甚不稍爲屈竟文致閒住而布政使鄭岳  
適爲濠所陷夢陽素與岳不相能岳旣得罪謂其傾  
之也濠敗辭連及賴刑部尚書林公俊力救得亡窮  
治乃後大臣暨撫按數論薦不用嘉靖辛卯就醫京  
口還大梁病卒所著有空同集若干卷夢陽以命世  
之雄材洞視元古謂文莫如先秦兩漢古詩莫如漢  
魏近體詩莫如初盛唐乃與姑蘇徐禎卿信陽何景



明作爲古文辭以蕩滌南宋胡元之陋而後學者有  
所準裁彬彬郁郁茂以尚矣竟以負氣傲睨屢得奇  
禍坎壈終其身世咸疾之如讎嗟乎斯人也豈世俗  
所能容哉

延安府

郝志義

郝志義字宜之陝西清澗縣人成化己丑進士授大理評事進寺副陞山西按察司僉事整飭鴈門關等處兵備陞副使坐事左遷福建都轉運鹽使司同知明年復陞福建按察司副使以憂歸服闋改山東陞四川按察使歷山西四川左布政使陞右副都御史巡撫湖廣進刑部右侍郎未上而卒賜祭葬志義炷嚴毅狷介持已處人皆循蹈渠矍居官以廉慎著聞人無能訾議之者

劉仕

劉仕字以學中部人正德辛巳進士歷刑部郎中讞獄山西御史馬錄質以張寅罪狀仕言寅爲李福達不疑及移寅詔獄仕以郭勛庇姦劾之獄成上逮治仕謫戍邊赦還卒隆慶初贈太僕少卿

張文奎

張文奎字應光別湘山陝西洛川縣人生有至性聰敏過人而篤信行不事華飾始受學于鄉之孫先生年十二能文遂菴楊公督學試補縣學生員歷試學臺皆列首選正德丙子舉于鄉明年丁丑登

進士試政吏部己卯授刑部主事無何丁外艱嘉靖  
甲申服闋復除原官丙戌進員外郎躬勤聽斷據法  
原情不撓權勢不侮寡弱稱明允焉陞四川按察僉  
事先時芒部弗賓叛服無常至則親涉夷境諭以恩  
威夷民歸化時蜀地屢飢賑施惟殷乃遍履荒遐不  
以艱苦避遜適有貴官謫居行頗不法繩以憲略不  
假借爲流言以中之己丑移山西按察司督理屯田  
時叅將某違例占種人不敢詰按劾不貸屯政就理  
尋以賢能膺薦再奉璽書飭兵石隰武備聿修癸巳  
考績晉四川布政司右叅議是時向所繩者適撫其

地援例疏請迴避因有論辯詔命所司停勘卽浩然  
休致構亭教授曰吾當爲蒲擲山人矣丙申事白奏  
上左遷一級丁酉添註直隸廬州府同知往添註官  
多不事事奎力政不怠墾荒復通郡乃大治戊戌晉  
湖廣按察司僉事督理江防已亥 上南巡興都職  
除道建航供備行宮所事克舉 上嘉其績賜衣一  
襲白金三錠是歲 章聖皇太后祔葬顯陵護送梓  
宮自劉家隔抵石城驛川途無警奠獻如制乃又以  
法檢束從官往來道途事集而民不擾使者以辭復  
衣一襲白金二錠庚子晉江西按察司副使職

軍伍兼理驛傳按籍稽勾酌宜裁革二政允修若其  
發指揮羅某之姦息妖人易盛之亂尤爲顯績壬寅  
晉四川布政司叅政癸卯入蜀視事乃華州縣庫役  
之供應罷西路夫役之輸銀催科撫字寓仁于政民  
愛畏焉晉江西按察使江西爲南方之大省宿號難  
理先政在民見其至欣迎載道持守不阿貞肅有  
道憲度改觀未幾晉山西左布政歷官旣久廉節愈  
厲惟攜二童侍行俸金亦以貯庫大革加耗裁損公  
費覆露廣遍晉省以寧然以不通請謁不事逢迎久  
居不遷丁未以內艱西歸居憂讀禮無愆孝思卒之

先數日夢乘白馬而行又夢雪中輓紉覺語其子曰  
日且大雪吾其死夫已而果雪沐浴正冠奄然逝矣  
晚年好神仙服食修煉自謂有得恒以仙官自况退  
而燕居凝神內照泊如也

### 馬汝驥

馬汝驥字仲房綬德州人也正德丁丑舉進士已選  
庶吉士尋授編修號爲才子能詩然爲人沉毅有大  
節已卯中武皇南狩諫者輒獲罪後縮喑莫敢諫  
者汝驥曰卽畏罪寧不爲宗廟朝廷所乎乃率諸  
同館士六七輩赴闕上疏言巡游有隱憂伏禍不可

天子怒罰跪闕下五日已又杖之調澤州知州澤故  
多王府王率聽用邪小暴侵民利澤人苦之而未能  
有禁也乃因事稍懲其左右不法數人爲條告誡止  
又王以書來請私好答使者去已卽投書櫝中封之  
所請或干法得釋又使將謝乃令使者至櫝前啓取  
書還之實未發爲報曰法誠如是吾安敢低昂徇情  
乎陵川令葛者賄人也害人人怨之廉得狀議且黜  
令有巡按御史者以親故爲葛解甚力不聽竟置于  
法威聲震于部中辛巳 世廟卽位錄前諫者忠  
詔起知州還爲編修如故澤人攀泣送之以百千數



而前王以禁不得暴及投書不發者亦郊祖頌德焉  
曰馬先生民之父母國之正人也其年 天子用吏  
部請旌忠加俸一級名由此益顯癸未會試同考官  
乙酉 武宗實錄成有纂修勞陞修撰明年母王卒  
歸三年煙山公亦卒兩載連哭其父母至嘔血毀形  
制起陞南京國子監司業尋改北監司業會 天子  
幸太學充講官坐講言辯而正賜文綺而司業壓于  
祭酒不得有所規畫然諸生固知憚馬先生持重有  
議度居數歲陞南京通政司右通政又三歲爲南京  
國子監祭酒於是慨然曰自予爲司業固嘗念諸生

善逸繩之今與諸生約度所能行耳期勿犯犯必罰  
如懸格不解其所約有懲跣跣勤考課稽德行肅威  
儀數事有制太學生出散諸曹歷事出序視入不得  
越而捷者或因貴人關說求疾出卒不聽卽序及故  
抑奪之曰以懲求者蓋自是太學之教彬彬循循多  
可觀云庚子陞禮部右侍郎當是時少傳嚴爲宗伯  
官詹松江孫爲左侍而上興禮樂創制度諸大典更  
起不絕諸公日聚講議而汝驥洽覽羣集習識古昔  
遇可言則問答如響平居視之顧恂恂若不能者嚴  
賢之又嘗善其詩愛重踰等居久之嚴拜相見上

言馬侍郎賢遂陞左加翰林侍講學士寵之而故病  
肺自始仕至今未嘗一日廢書不觀遂病卒 上悼  
之遣官致祭護櫬歸 勅有司營墓加贈尚書謚曰  
文簡所著有馬文簡集又有西玄先生詩集

附

綏德衛  
寧夏衛

慶陽衛  
涼州衛

紀溫

紀溫字宗直延安府綏德衛人生而魁岸有風骨識  
者奇之曰當以文顯比成童補弟子員成化乙酉舉  
陝西鄉貢卒國子業榆林衛在綏德西地逼邊境人  
鮮知學余肅敏公爲巡撫都御史奏設衛學官不時  
置禮聘爲師溫規格嚴整經指授者多底成立屢誦  
禮部親寢老乃以壬寅就銓試授吏部司務時尹恭  
簡公爲尚書特見器許弘治戊申以外艱去辛亥改  
都察院經紳士無問識不識皆知有紀司務者癸丑

擢戶部雲南司員外郎甲寅以內艱去丁巳改兵部  
郎中壬戌上疏請老特陞太僕寺少卿致仕居京師  
未卽行數月而卒溫敦重寡言咲而綜理周密咸中  
條節族黨貧乏嫁娶喪葬有所需者應之恐後嘗謂  
榆林風土差厚徙居之見其四郭平行可種藝而去  
水遠相地勢傭工力雜丁鑿山通道引紅石硤水歲  
溉田若干頃人至今德之居官謹畏不避勞勩車  
駕行邊竭力支應其憂悴成疾亦以此云

陳震

陳震字文靜上世武進人也曾祖肆從太祖皇帝

定天下有功累陞都督僉事而薦其子友爲蔚州衛  
指揮同知正統間改慶陽衛遂爲慶陽衛人生而神  
宇凝重氣度洞達人咸異之洎長受易於鄭州王先  
生未幾有內艱煢煢無依乃依叔父祿而祿天性孝  
友視若所出故得肆力于易成化甲午中鄉試高等  
數試禮部不第益自砥礪卒登丁未進士弘治戊申  
拜監察御史風裁凜然凡所按行姦貪望風而解寬  
者平逮者釋時以爲真御史也丁巳陞山西按察司  
副使恥尚嚴峻務以德化而已壬戌陞本司按察使  
憲度益修人用丕變正德初以御史盧儀事誑誤左

遷兩淮鹽運使司同知尋轉長蘆運使曰是不可以  
已乎力請致仕得允居數年以薦授陞光祿卿已復  
陞戶部右侍郎庚午夏值寘藩反逆改爲兵部右侍  
郎兼左僉都御史總全陝之師以討之寧夏遂定復  
歸慶陽嘉靖乙酉壽七十有九而卒立身甚嚴遇事  
不苟事無鉅細執其樞紐至于低昂起伏咸中窾要  
而于學無所不通天文律曆具得其妙慶陽北定邊  
管有妖自名趙太白諸貴人狎而遊之有貧乏者輒  
重以賙予及所厭怒卽以鐵簡飛擊之一日謂諸貴  
人曰明日慶陽陳舉人至我與有干不可相見當與

諸君永別已而震至稟賦之正爲邪所畏憚如此

### 王誌

王誌合水縣人永樂乙未進士知河南府死于王事  
勅撰旌忠碑廟祀之孫琦弘治中知項城亦死于賊

### 鄒昊

鄒昊字宗大寧夏人弘治乙未進士拜行人擢監察  
御史忤逆瑾謫真定府推官瑾敗陞四川僉事督兵  
勦藍廖等賊於大壩山以功累遷四川巡撫達賊犯  
松潘昊擊走之加俸一級又以討平僂蠻普法惡及  
松潘番端竹白等功陞右都御史後坐天全土官高



繼恩事逮京下獄嘉靖初釋復原職當時如楊一清  
胡世寧李承勛皆薦其可當大任而不爲新貴用事  
者所喜未盡展其蘊云

張嘉謨

張嘉謨字舜卿寧夏衛人少卽耽嗜筆研書史英奇  
穎異不類常見弱冠爲衛學生耕讀自力志向遠到  
弘治辛酉舉于鄉明年遂卽上書請終養得請歸色  
養備至人稱以孝時乃開館授徒一時英髦多出講  
下正德丁卯父卒已巳服闋授兵部武選司主事家  
食時稔知武選宿弊事事躬自檢覈吏姦不售選人

大快辛未盜起山東侍郎陸公完督軍平勦與主事  
王崇獻皆以才略贊戎務初官軍之東也日尾賊後  
行止視賊故賊益猖獗功無所成乃獻議陸公謂當  
出奇以遏其鋒審勢以奪其氣若徒尾其後是驅賊  
以自戕也何損於賊何益於民陸公是之會賊犯濰  
縣陸公以偏師屬之提師行一日卽按兵不進賊易  
之不爲意乘其怠也卽夕疾行掩擊大破賊斬首二  
二千級賊遂奔河南回部陞車駕司員外郎癸酉蜀  
盜滋橫詔起兵部尚書彭公澤往征之彭公疏請  
與行乃告彭公曰蜀地險阻用兵爲難今王師西征

賊心震恐勢必不支若順流而下則荆湖之憂方劇  
矣公若分兵屬僕由漢中取道以扼夔峽公以大兵  
取重慶以蹙賊則成禽矣彭公深然其策後卒奏功  
凱旋陞山東按察司僉事兵備濟寧已而沂州礦盜  
竊發宗藩弗戢撫臣疏奏移兵備沂州持法厲禁忤  
觸藩邸赴愬于朝以是冬逮下 詔獄在獄數月乃  
得白然竟由此罷去旣歸退居城南別業事親教子  
授徒力田如素士蓋二十年不移初志嘉靖癸巳偶  
爲詩書壁間云年來慵懶謝交游日接盧醫扁鵲流  
可歎明朝更分手短橋新柳雨聲秋人見之頗訝其

無謂不數日臥病甫七日卽不起得壽六十有二平生好書學篆隸行草各得其妙詩文敏捷自成一家所著雲巖集西行稿藏于家

### 楚書

楚書字國寶寧夏人嘉靖癸未進士任兵部主事大同之變書觀兵城下城中俱登陴請曰吾輩非殺主帥者亦無他志但畏死自保耳請書入書遂入諭慰之且言用兵非朝廷意衆皆望闕呼萬歲書仍遣馬昇等陳朝廷威德曉以禍福令獻首惡至夜賊平累陞右副都御史

吳克忠

吳克忠涼州衛人永樂十六年嗣爵二十二年扈  
駕出塞有功洪熙元年以戡里愿兼有功進侯正統  
九年統兵出喜峰塞征兀良哈有功加太子太保十  
四年沒於土木贈祁國公謚壯勇弟克勤都督亦戰  
沒贈遵化伯謚僖敏子瑾嗣曹欽反劫瑾不從死贈  
涼國公謚忠壯

張達

張達涼州人起什伍歷官總兵鎮守大同嘉靖二十  
九年夏虜酋俺荅率衆數萬入大同塞計伏精銳殲

谷中而以羸騎百餘誘我軍偵卒信之走白達達  
以果敢名徵兵未集遽率麾下卒馳擊之伏發圍達  
數匝馬蹶集刃死事聞贈左都督謚忠剛

人物考卷之一百七目錄

四川成都府一

焦敏

趙天澤

向敏

李蕃

杜銘

何漢宗

尹淳

桂山

溫琮

梁萬鍾

鄧本端

蕭儼

張玉林

龔鼎

王弼

劉時敦

趙珊

吳瓊學

王志恭

何琛

任漢

王資良

宋有文

汪藻

鄧翰

蕭翀

張賁

楊廷和

王一言

馬炳然

楊春

李志剛

劉寅

計朝聘

李佶

金獻民



劉瑞

李充嗣

楊慎

王汝舟

熊允懋

張潮

趙貞吉

周滿

齊準

何全

周冕

陰武卿

賀朝用

陰秉衡

吳泰

楊惟懷

張時中

羅天祐

邵道人

補遺

楊訓文

胡亨

梁萬鍾

劉士元

王之臣

李鳳毛

本朝京省人物考卷之一百七

南直督學御史西浙過廷訓纂集

門人蘇松備兵副使南郡熊膏叅閱

男過銘盤

過銘孟

過銘簞

寧國府學生員嚴弘志

句容縣學生員劉孔揚全訂正

四川成都府

焦敏

焦敏灌縣人洪武間以貢任永豐訓導蹇貞公恕薦  
為主事歷刑部員外卒于官敏諳刑名而行之以恕  
所至著水蘂聲曾孫韶登成化進士授刑部主事提  
牢得代盜謀刼獄獲而訊之曰恐累焦君故遲遲也  
陞武選郎中出知曲靖境產瑞禾府民歌曰一本二  
穗嘉穀滿田太守焦公仁德及天爲立生祠終副使

### 趙天澤

趙天澤蜀新都人與同邑杜圭明文行齊名棄官薄  
遊江南無貴賤皆倒屣迎之最善枯蒼劉公伯溫一  
日行省大臣論江左人物天澤首以伯溫對衆愕然

且竊笑之天澤退而贈劉公文曰蕭何拔韓信之  
德師孔明非信任之篤則泝水之奇八陣之妙何由  
照耀後世乎方劉公未遇授之以卜法者曾義山而  
深奇預識者天澤也趙有吳江月下泛舟詩云餘霞  
斂遙岑微靄生近浦江行得良夜月出鳴柔櫓茫茫  
天欲流歷歷星可數水螢明乍滅沙禽或翔舞此意  
誰與同三高渺千古

向敏

向敏資縣人永樂進士歷官大理寺丞獻獄平反守  
武昌有政績卒于官僚佐發其囊惟圖書衣衾而已

李蕃

李蕃字秀實唐涼國公愬之後內江人自幼警敏異常兄旣長力究羣經中鄉試副甲榜遂領教職以上疏論事陞行在兵科給事中其爲教官以師道自勉爲給事中克舉其職命視關外城壘還陳備邊策清理軍政於河南人稱公平還獻安養軍民十餘事所至采軍民利病以聞每二親不就養請分俸給之朝廷宴賜或有嘉味美醢綵幣謹封識奉其親及得推恩於父母乃請告歸省賜楮幣爲道里資其處內外親姻皆有恩意姑二人早寡迎養于家其子咸底成

立朋友鄉鄰以善道相與卹困窮化橫逆皆可稱述  
素甘澹薄言不及產業誤家範一編教訓子孫所著  
詩文有鳴佩集藏于家

杜 銘

杜銘字敬修成都金堂人少有異質舉正統六年鄉  
試十年第進士授刑部河南司主事論決輕重能盡  
法意自尚書以下皆器重之總十三司章奏羣僚堂  
叅時有疑獄不決者皆聚而質於銘歷階員外郎郎  
中他司郎中缺嘗兼領其事至晚他司吏往往抱三  
四印歸其家銘愈謙退不伐衆益賢之景泰六年尙

書江公淵巡視南直隸河南山東等處舉銘自輔有  
詔慮囚貴州出滯獄數十百人貴州人謹傳以爲神  
丁母憂復除河南司尋陞雲南按察司副使黜賊吏  
剔幣政聲稱厥起未盡一年會有誤傳新任按察使  
呂困道卒者守臣交章薦補其處遂授按察使已而  
呂復任乃改於貴州居三年部使者列上其風績陞  
湖廣左布政使湖廣爲東南大藩最號繁劇銘裁決  
庶務宣布德恩治行稱異等成化八年召爲戶部右  
侍郎比至京陞工部左侍郎未幾轉刑部十一年按  
事襄垣擢都御史提督山西三邊軍務出代州歷鴈



寧武至偏頭關徧行邊壘覽觀形勝時時召老兵  
退卒問以攻守之宜益市馬募兵補完虛籍因建議  
偏頭關在山西窮邊東連威遠西帶保德北接虜境  
猝然有警戍者出戰便爲虛邑宜設千戶所一領百  
戶所十就以戍兵願畱者實之又言三關兵民雜處  
事多牽制官利乾沒於豪家勁卒占役於私室請置  
按察副使一員督治之俱從其議又於要害處設土  
蓬堡之望高視遠二墩久之虜知我有備遁去還朝  
奉旨審錄罪囚有白金文綺之賜十六年按事寧府  
還奏明年以父憂去官終制仍舊任二十一年秩滿

九載加正二品俸尋遷工部尚書掌大理寺事故事  
拜尚書者率上疏禮辭銘曰事君貴誠虛讓非禮也  
獨不辭自刑部轉大理其所駁正一裁以法不嫌于  
專時論多之明年改刑部尚書 憲宗皇帝在位久  
明習政事尤慎重刑獄銘時教飭其屬吏以人命至  
重勿以喜怒用法度一時用刑號稱平允明年乞休  
優詔不允屢疏得旨賜寶鏹二千貫仍給驛以行公  
卿大臣設供張祖道崇文門外觀者榮之旣至家稍  
葺舊廬燕休之室扁曰敬齋兄弟賓客日過從爲樂  
當春夏時扶杖從一二僮子課家人田作田父野老

攜酒餉之爲引滿不辭人人感德而去優游林下者蓋十有餘年居家常衣布衣或曰公以大官被服如此得無近陋邪公曰我故布衣也在官服官服居家返吾初服何陋之有其自用雖約然至於周貧恤孤則惟義是從多費不吝也卧病少間具衣冠端坐召諸子曰吾入仕自壯至老勉於忠孝始終保全至此若等能讀書爲善不使家聲落莫吾死瞑目矣乃卒春秋七十有八

### 何漢宗

何漢宗溫江人正統進士歷官副使平生尚氣節不

隨時俯仰居官清介家甚貧學士周洪謨稱爲鐵石心腸

尹淳

尹淳崇慶州人正統舉人授狄道教諭言動不苟以身率人九年擢御史巡按雲南摘發奸宄所至有聲歷官叅政致仕著陶治集二十卷

桂山

桂山字本寧成都人南唐司空桂卿之後正統甲子舉于鄉登景泰辛未科潛榜歷戶部郎中老練廉潔剴理無遺凡有關軍國者雖拂衆力爲之不顧司徒

為昂甚稱譽之陞廣西叅政守左江時大藤峽徭獍寇南寧亟山一日馳至選土兵據要害以禦之烽火相望寇懼遁去民賴安堵夷畏其威不敢肆云

溫琮

溫琮華陽人登景泰進士任御史巡按雲南時藩鎮錢能貪橫琮執法不撓風裁特著能因斂手避之弟璽成化進士歷河南叅議人有難兄難弟之稱子仁和官至禮部尚書

梁萬鍾

梁萬鍾溫江人景泰進士知仁和興利舉廢崇教厚

俗邑民肖像祀之擢知杭州復除西湖淤患陞兩浙  
鹽運使未幾乞休坐逆瑾椅撫代民償逋負三千兩  
盡鬻田產輸官恬不介意年九十無恙課子孫相繼  
登科

鄧本端

鄧本端資縣人景泰進士拜監察御史有文武才能  
成化間劉千斤等作亂僭號命端督諸軍討平之陞  
陝西兵備副使

蕭儼

蕭儼內江人景泰進士歷刑部郎中審錄多所平反

陞雲南叅議河南叅政時州官不法逮巡按守巡官  
至京惟儼素有風力得免餘皆被黜尋陞貴州左布  
政使奏請頒樂器增解額俱賜允俞致仕卒所著有  
竹軒稿三十卷集皇明風雅廣選五十卷

張玉林

張玉林內江人幼以道義自重馬湖土官安鰲聞其  
名延之師位爲置產築室居之固辭而返登景泰進  
士疏言七事知壽張縣以古道化民不任刑法陞北  
勝知州卒于途有靜菴集及語錄

龔鼎

龔鼎雙流人天順進士幼稱孝友篤愛鳳弟任主事  
能績守南陽遇宗室縱橫寘以法悉斂跡擢雲貴  
叅政封君文貴義方德壽表重鄉閭子嘉祺令福清  
有父祖風稱世家云

王弼

王弼華陽人天順進士初知開化豪民余聯勒奪人  
田土妻女持府縣短長前令不能制弼法之其黨懼  
誅火牛尾爲厭勝弼捕之急乃夜持匕首匿公廨將  
以害弼爲雷震死陞監察御史平反獄囚數十人陞  
福建僉事漳南溫文聚衆爲惡以計獲之弼質實清



慎居喪三年足不至公府子汝舟汝梅俱登進士

### 劉時敦

劉時敦字用行別號素菴內江人年二十五魁于鄉天順甲申第進士爲刑部主事轉員外郎又轉山東按察僉事分按東兗終訟積數百事逮干人就繫動數三歲裁決浹月而盡訟爲之哀濟南大旱先期虔禱蠲租平糴藥疾食瘠招流而瘞殍力且匱獻計巡撫以亟請于上得發米二十萬石銀四萬五千兩錢五百五十餘萬民賴全活甲午巡淄川疾作猶強歷數縣至長清興還越七日不起年三十九察使王

君琳提學楊君琅檢其笥敝袍數襲俸遺無十金

趙珊

趙珊綿竹人義士天順甲申德陽賊趙鐸叛珊仗義  
攻殺手刃數人掩捕散亡追至二郎鎮爲賊所害詔  
錄其子恤其家焉

吳瓊學

吳瓊學綿竹人與珊倡義討賊賊潰瓊極力追殺遇  
害詔廕其子

王志恭

王志恭綿竹人慷慨仗義渠賊趙鐸叛攻陷州郡志

恭首倡討賊之義率兵二萬餘會德陽鐸潰志恭單  
騎擣穴鐸幾就擒從兵不至爲矛所中脇下腸出猶  
戰出重圍以手捫腸大叫衆士併力言不絕口而死  
事聞贈始信校尉廕其子成都衛百戶

### 何琛

何琛成都人登成化進士知蠡縣有善政拜御史清  
理湖廣貴州糧儲及巡按雲南風裁凜凜權豪斂迹  
時征叛夷劾將官擅殺冒功者黜之陞山東副使調  
江西觸逆瑾罷職瑾誅起爲湖廣按察使貴州左布  
政使卒于官時論重之

任漢

任漢溫江人登成化進士歷御史抗疏論列權貴斂  
避林公俊稱爲真御史累進布政使剛直不撓陞右  
副都御史改總治鄖陽經略三省多所建白陞南京  
大理寺卿浩然還蜀平生孝友容止矜莊有詩六卷  
奏議十卷

王資良

王資良成化進士官兵部郎中遇事精審不紆不迫  
名公咸禮重之擢臨安守夷民雜處難治大布恩信  
民愛之如父母雅重風教士經指授者咸登科第晚

年吟咏陶然自得

宋有文

宋有文資縣人成化進士歷都御史巡撫陝西黜奸去貪不私故人致仕歸囊無餘物第宅一仍其舊人多其廉而子孫亦甘其貧云

汪藻

汪藻內江人幼以奇童稱七歲補弟子員登進士由翰林歷叅政首劾汪直王越開邊釁立西廠章上罷廠貶直越朝著肅然

鄧翰

鄧翰內江人成化進士任知縣卓有異政陞府同知  
操守堅定舉止不苟致仕家居繼母停柩火災延及  
室室翰以身蔽捍火至不動尋滅人以爲至孝所感

蕭 翀

蕭翀字凌漢內江縣人成化辛丑進士弘治十一年  
陞浙江按察司僉事才識明敏遇事不爲遲疑當機  
立斷在浙五六年間風采振揚清操冰潔民情士論  
皆歸之擢陝西按察司副使致仕歸里

張 賁

張賁成都人成化丙戌進士授南京戶部主事歷員

外郎中弘治初擢南京光祿寺少卿累遷通政司叅議太僕寺卿致仕卒賜祭葬賁朴雅有長者風歸十數年與鄉邦耆彥結會以詩酒自樂云

楊廷和

楊廷和字介夫新都縣人成化戊戌進士改庶吉士十六年授翰林院檢討歷修謨進左春坊左中允丁憂補原職陞大學士兼翰林院侍講學士命同學士張元禎爲會試考官取董玘等三百人得人最盛尋陞少詹事兼翰林院學士正德元年進本府詹事陞南京吏部左侍郎初武宗御經筵講書故事講解

書義畢終必獻規諫之語是日廷和同學士劉忠直講既罷上謂劉瑾曰經筵講書耳何添出書外許多說話瑾乘間嗾之陞二人南京侍郎遷尙書十月改戶部尙書兼文淵閣大學士入閣辦事加少保兼太子太保進吏部尙書兼武英殿大學士七年十月進少師華蓋殿大學士廷和上疏請早視朝御經筵罷邊兵西僧市肆等項以憂去服除起原官仍內閣辦事十二月上時巡邊廷和言北虜不時出沒正統末年之事可爲明鑒請回鑾不報十三年上復議北征廷和諫萬乘不宜輕出不聽會上自稱威武



將軍令內閣草勅廷和同大學士毛紀上疏謂大  
祀之禮在正月社稷之祀在仲春 孝貞皇后大祥  
在二月二日禮應卽時祔廟今俱改期至再甚爲非  
宜朝覲官員吏部考察上請未奉定奪各官離任旣  
久政務悉廢殿試進士之制亦已踰期自去秋 聖  
駕南行至今八月有餘在京在外各衙門題奏俱未  
蒙發出施行伏望 亟賜頒師還京舉行前項大禮  
各衙門題奏文書早賜發出毋致事務久稽至生他  
虞不報十六年 武宗不豫廷和等密請 太后懿  
旨誅江彬籍其家定策迎 世廟嗣位會命議 興

獻王主祀稱號廷和檢文獻通考漢定陶王宋濮王  
事曰是足爲據異論者卽奸邪當斬七月進士張璠  
疏論繼統繼嗣不同力詆朝議上令送至內閣廷  
和復持入上言禮謂所後者爲父母而以其所生  
者爲伯叔父母蓋不惟降其服而又異其名也臣等  
不敢阿諛順旨仍封還手勅旣御批加興獻帝后  
皇字廷和等復上言恐紊一代綱常拂萬世公論敢  
封還御批若加皇字是忽所後而重本生任私恩而  
棄大義臣等不得辭其責者願罷歸上曰卿等所  
言皆大義朕奉至情不必拘於史志可勉錄皇號廷

和等倡九卿翰林科道連章劾張璫邪說願罷斥之  
不報嘉靖元年壬午春以翊戴功加伯爵廕一子爲  
錦衣衛指揮使辭免仍加錄廕五月有旨免日講命  
下廷和上言人君一心關係最重養之以善則智若  
聲色貨利一動於中則害政害事其患不可勝言伏  
望 皇上宮中無事不廢讀書以涵養此心其大學  
尚書容臣等接續前所講讀者量進起止有疑召臣  
等詢問暇則時臨古人法帖一切聲色貨利不使少  
接於前 上喜其言二年以少師十二年考滿特加  
太傅兼官賜宴禮部時上於欽安殿修設齋醮廷和

等上疏言臣嘗極言異端左道亟宜痛絕及條愼始修德十二事具書殿廡今無故修設齋醮日費不貲此皆先年亂政之徒艾鋤未盡妄引番漢僧道嘗試

上心夫佛家三寶道在三清同一虛罔昔梁武帝宋徽宗敬信尊奉無所不至一餓死臺城一囚繫虜庭求福未得反以速禍其無益有損明矣行香拜錄之勞孰若移之以御講筵設醮修齋之費何不移之以周窮困乞畱神斥遠左右奸人僧道罷停齋醮清查冒濫恩賞又以直隸江北水災異常疏請集議賑救併蠲一應歲派錢糧會內織染局奏乞依成化弘

淮年間例差本局官二員請勅往蘇杭五府提督織造廷和等上疏言今年直浙水旱異常稅糧尚冀蠲免若更差官織造工役何能措辦非惟逼勒逃亡抑恐激成他變況經過淮揚邳徐諸府縣見今高低一望皆水房屋田土槩被淹沒所在白骨成堆幼男稚女稱斤而賣十餘歲者只可得錢數十母子痛哭投水而死官司議賑而錢糧無措自今抵麥熟時尙數月饑民豈能垂首枵復坐以待斃必起爲盜近傳鳳陽饑民哨聚刼掠莫敢誰何將來事勢尙不可料所有勅書決不敢撰上以織造累朝事例令無再擾

執拗時九卿科道皆極陳其不可廷和等復上疏曰  
臣等備員輔臣非敢瀆擾誠恐窮民不堪羣起爲盜  
以擾天下亦非固執違拗所執者祖宗之法望 陛  
下遵而行之以保宗社勿與公議相違取譏後世況  
考洪武永樂至天順並無有此惟正德年間權奸亂  
政始擅自改擬營求 御批以濟其私 陛下何忍  
墮其奸計復敗壞 祖宗之法度 祖宗天下至正  
德幾傾覆賴 陛下再造軍民始獲甦醒今日豈堪  
更自敗壞報曰卿等所言具見忠愛恤民至意但業  
已差官第寫勅令安靜無擾三年二月以議大禮忤

力求去令致仕尋削籍爲民

### 王一言

王一言字行之內江縣人成化辛丑進士授監察御史陞雲南副使整飭兵備再轉都察院僉都御史巡撫寧夏偶渡河墜冰衆掖出之以此致疾卒于官一言體貌脩偉善談笑爲御史頗有風來居官亦能盡職

### 馬炳然

馬炳然字思進成都內江人成化辛丑進士知嘉魚縣民有爲人作狀牒者炳然訊其人名而問之曰汝

民當各安公畏法何至爲人造訟乎對曰窮無以養  
寫一狀可活吾家數人炳然自責曰不富焉能教厚  
其資使力本自是公門游食者悉遁去炳然爲政明  
察而不煩暇則巡行村落益悉某人堪某事某戶堪  
某役胥徒不能爲姦三年大治流民復業乃新治事  
之堂扁曰富庶教退居之堂曰絜矩二十三年丁未  
夏秋之交湖湘旱饑炳然申賑貸未報輒開倉救之  
明年又饑 朝廷出內帑錢以賑民府守意令具文  
放散而寔欲轉輸府庫也炳然曰天降凶荒爲政者  
之罪也卽放散之守怒炳然不懾也歷官副都御史



督南京儲至武昌青山江中遇流賊劉六爲所挾令作書退軍不從遇害妻女俱溺死事聞贈右都御史謚毅愍

楊春

楊春字元之別號畱耕新都人父官永寧卒于官二子繼沒時春尙幼隨母護三喪歸會苗賊亂出入間道區別外內入夜則防護嚴密或竟夕不寐雖在逆旅肅如堂室性穎異日記數千言顧弗克得師自取家舊藏周易讀之晝夜研究閱歲遂廩于庠名頓起成化元年乙酉領鄉薦越十七年辛丑始舉進士引

疾歸養母日已既至是復明時時趣北上不忍違居久之 孝廟嗣位乃赴選授行人司正行人職掌舊制如冊封宗藩徵聘大臣之類多爲諸司所攝悉奏復之壬子丁母憂服闋擢湖廣按察司僉事奉勅專督學政過家值子廷議得鄉舉意不欲出親友強之乃赴任作士以德行為先歲時考校鑒別精當凡所甄賞多捷科第時誦其明歸志素決巡撫都御史暨諸藩臬以試事畱之旣放榜卽疏乞休致遂行居家越十有八年乃卒春諒直純厚孝友出天性母夫人素嚴事之甚謹惟恐拂意二弟少孤撫教周至皆克

有家治家嚴甚閨庭整然無敢輕出入者雖諸孫  
燕見不命之退不敢退教諸子必舉先賢言行爲說  
雖小過亦不貸嘗曰修身正家吾人分內事居官能  
推之國與天下乃爲實用與人交有信初若難合久  
乃益爲人所敬愛接引後進寸長片善稱揚不容口  
未嘗及人過失學博而邃在太學時常與天下名士  
卽饌堂爲文會辯析亶亶有據衆咸心服焉四方從  
游者多踵接爲顯官志存濟物縣南橋圯鄉人病之  
出俸金數百兩修治蜀藩義其舉助成之又患城守  
弗完當預爲之圖城成流賊果至趣來保聚者數萬

人皆得免於兵平生不習術數而言輒奇驗湖湘人  
往往傳其事以爲神

李志剛

李志剛成都護衛人登弘治進士歷刑部員外首劾  
逆瑾不法推廣東僉事平劇盜復民田以萬計民祠  
祀之居家友愛四方從遊之士相望于門

劉寅

劉寅雙流人弘治進士資性醇厚事繼母至孝隨父  
宦淮陽從王衢吾遊莊定山結爲忘年交及長奮志  
力學登第官南京考功出守寧國值歲歉賑活甚衆

流賊之變備豫免患建梅都官祠擢叅汴藩未幾以疾歸有文集數卷行于世

### 計朝聘

計朝聘字莘夫成都人正德庚午舉人性孝悌邃易學以遺貲讓二弟以正學啓門人授真陽令歷澂江知府誠心敷政約已愛民增建昆明學舍數十楹捐俸賑饑督兵平寇開海田三千畝俾民佩犢以耕寬稅恕刑部民剏祠祀焉引歸林下布蔬自怡不事干謁明孝友以遺訓子孫壽八十二太史康余二公有廉節傳稱古刺史所至有冰蘖聲卒之日撫臺陳公

評其清白之操終始不渝說者謂其爲知公云

李 佶

李佶金堂人正德進士選翰林庶吉士嘉靖初拜御史巡按浙江獨持風裁一時貪墨望風解去申明科舉新法奏革織造太監時以剛直忤時相毅然乞休縉紳重其風節

金獻民

金獻民綿州人進士歷官湖廣按察使爲政剛明不避權倖以忤逆瑾罷歸尋召進都御史刑部尚書掌院事持大體不事苛煩糾劾彈舉臺中肅然進兵部

尙書嚴明精察序次武籍犁然不紊

劉瑞

劉瑞字德符成都府內江縣人生而穎異十歲能詩  
文父時敦歷山西僉事鍾愛之爲作五清書舍期以  
聖賢之學因號五清主人云時山東提學楊公瑯嘗  
集諸同寮子試之特奇其不凡未幾僉事公卒貧無  
以爲斂寮索賄之廼克西還應成化丙午鄉試初擬  
發解監臨官以其儒士寘第六逮揭榜設宴禮之與  
解元等人傳丙午二魁云舉丙辰進士讀書翰林三  
載受檢討弘治己未清寧宮災下詔求言上疏論弭

災之端有八曰崇實德親儒臣嚴近習全孝思旌直言勵士風畏小民御戎狄疏入 孝宗加納庚申北虜犯邊復上疏云虜人有必勝之機而我師無可當之勢宜下求才之詔作賞罰之權別用人之等定戰守之計時論避之是歲重修闕里廟成詔故少師西崖李公祭告因獻議欲更定先師封諡卒不果行壬戌同考會試所取多名士楊杲何景明其尤著者與修通鑑纂要充經筵官有白金楮鈔之賜 武宗卽位上疏乞端治本以光繼述一曰隆孝德二曰求聖學三曰勤宣召四曰嚴責任五曰擢名望六曰明賞



劉七曰抑僥倖八曰絕異端九曰禁澆俗丁卯逆賊  
劉瑾擅權亂政毒虐縉紳嘗言事者咸得罪瑞知不  
免卽上章謝病旣出京之明日瑾矯詔斥大學士劉  
公健而下賢士大夫凡五十三人爲朋黨勒令致仕  
瑞與焉瑞聞之恬然奉母以行沿浙江沂鄆湖風逆  
幾覆舟亟以肩輿載母隨陸途行渡長沙江暮雨憇  
油草舖無從者侍母達旦由常德至澧田淑人女兄  
卽南京兵部尙書李公充嗣之母在焉適歲暮峽險  
田淑人不欲歸遂依李公居之李公以田數畝助其  
饗餐之資時逆瑾憾不已會都憲雍公泰忤瑾除名

謂瑞嘗薦雍罰米二百石輸大同坐是益貧養親樂道裕如也時太和陳鳳梧視學湖南檄諸郡邑士子從講學四方聞風而來者甚衆臨江蔡潮繼提學因以州後閒舍更爲澧蘭書院延講授其中後鳳梧叅政湖藩復檄辰守載敏創崇正書院請主之荆辰之士多造焉壬申正月丁田淑人憂五月詔起爲山西按察副使提督學政以制弗行服闋乙亥改浙江提學副使以復古明道爲已任其造士先德行而後有文藝有一行者必旌以廩食若行檢虧缺文雖工必黜於是士知向風人文大振遂定冠婚喪祭鄉飲鄉

射之儀著名宦鄉賢之祀教以釋奠歌舞之節而風  
化丕變矣部使者交章薦之將有顯擢適寧藩不軌  
鎮守者潛通逆謀浙謀洶洶與巡按暨藩伯共定捍  
守之策民恃以安已卯冬陞南京太僕寺少卿上疏  
乞休不允時寺卿他出瑞署寺馬政久弊檄屬郡戒  
掊剋禁姦豪憫貧弱故有牧場在著令歲久侵于豪  
民瑞復之有盜鬻馬者抵之法馬政爲之一新辛巳  
世廟入繼大統又請致仕弗許是冬遷南京光祿寺  
卿與中官雜處弊端百出瑞痛革之復上疏釐正其  
事請著爲令且疏薦屬官之廉能者三人於是中官

斂手而屬吏人人思勵民有侵光祿錢久繫於獄者  
死將半產不足以償瑞憐之爲奏釋其未死者七人  
癸未四月進南京太常寺卿瑞爲神樂觀樂舞生未  
有代耕之資奏乞以道童例納銀者免其赴京以其  
銀畀樂舞生爲糧詔從之八月進南京禮部侍郎是  
冬地震雷電雨雪交作甲申元日地再震水旱疫癘  
江南北人相食瑞憂之條六事以進曰多發帑藏曰  
嚴督逋賦曰督察賑濟曰修祭告曰謹戎備曰端大  
本言甚剴切時大禮議起大臣暨侍從臺諫部屬以  
辯諫下獄謫罷者殆數十人瑞將率畱都九卿諍之

草疏極論帝皇受命受終之道大宗小宗之義及漢  
唐宋以來入繼大統之典據經援史凡數千言時議  
禮主正論者凡九百餘疏惟瑞之言簡明深切上  
雖未盡從而亦不之罪也其卒之日晨尚入部視事  
既退食於家俄而疾作端坐而逝享年六十有五性  
至孝蚤孤事田淑人孝敬備至既歿哭踊幾絕哀毀  
踰禮歸葬經萬流驛遇風舟人錯愕瑞焚香籲天風  
卽止人以爲孝感所致忌日追奠尤極哀痛家廟時  
祭齋戒必誠牲醴必豐潔纖息一遵於禮宦遊數千  
里必載木主以行蓋近世士夫所鮮及者隨事建白

言無不盡坐朋黨及廢氣不少挫其居官惟法是守  
有干謁者輒峻拒之聞族人物故必爲位而哭持服  
視禮爲隆殺嘗畜內弟及族兄仲奇之女皆爲笄字  
如已出蜀有劉雄者嘗爲校官以憂去服闋赴選部  
客死嫠貧不能歸爲作書示沿途有力者嫠卒賴之  
初僉事公在刑部貸李姓者十金弗及償瑞訪李之  
妻倍數歸之不受後舉進士復訪得其子竟畀焉陸  
東臯歿家貧謁其墓爲文哭之出俸金二鎰爲其夫  
人葬具以米二十石給其家學以程朱爲正脉以居  
敬存誠爲本以窮理致知爲要病世之以心學名者

空自大而卒流於禪也故操存嚴密德器深厚半居  
無戲言情色雖退食必冠帶終日未嘗傾倚食無兼  
味衣無鮮綺尤寡嗜慾室無媵妾學甚博積書數萬  
卷口誦手披無斯須廢至老而彌篤雖刑名度數邊  
情民隱靡不周知惟痛絕佛老異端之說每遇 國  
有齋醮輒疏諫止其督學及在禮部禁約尤嚴作文  
以孟子史遷昌黎六一南豐爲法詩宗漢魏李杜而  
其要必本諸六經不爲浮靡險怪之說所著有讀漢  
書改本童觀錄幼學稿敷納稿禁垣奏稿澧蘭錄講  
習錄并雜文古今體詩若干卷藏于家

李充嗣

李充嗣字士修成都府內江縣人先是太夫人感異夢誕充嗣在襁褓寡啼笑及五六歲恬靜沉默一無所欲或戲觸之惟端視不語家人咸謂不慧而父愚菴翁獨識之曰此兒神氣非常不可易也一日翁觀書寘之膝傍俛然若有所思翁心異之指案上書曰是何物也又疑然若有所辯而未能者趣之對徐言曰所謂載道之器非與翁大驚曰吾嘗謂此兒不可易果然翁從仕吳楚皆携以隨卅角能草書工吟咏翁每以未藝爲戒遂棄其舊習一意慕古旣而以治



易故用伯父素翁謀偕北學京師爲西充少宗伯馬  
廷用門下生初至有邊報告急馬私試策舉兵儲爲  
問目卽席揮毫遽以卷呈所對區處精當皆有證據  
馬稱其年稚才老雖練達邊事者殆不爲過衆因卜  
其後當大用暨成化丙午領鄉薦亞魁丁未進士選  
入翰林庶吉士及徙戶曹主事旋改刑部主事審鞫  
悉中多所平反以累謫判岳州嘗勘九溪夷情益大  
獄也持牘立判庭中以不寃頌之秩滿擢知隨州始  
視篆以學舍傾欹廼謀葺新之工費不逮於民承荒  
曠之餘坊里凋瘵則謀求義倉之法酌宜而行斂散

有方凶歉有備境內以安民兵久弛則簡閱以時士益精銳後有巨寇流入境率衆拒之盡殲焉尤保愛士人嫉惡異說有李氏子名中者才敏而學贍以新籍爲桀猾者所擠乃力主之後舉舉鄉薦第一人考最陞陝西按察司僉事正巳帥物貴一憲度分理邊餉以公勤著聲時有中貴撓法正色不少屈常計事公署不合語侵之卽危言切責勸其貽害地方十餘事疏上 孝廟褒其直中貴銜之欲甘心焉十六年會愚菴翁訃至去位獲免服闋以太夫人故欲圖終養未卽上道而 孝廟陟遐正德改元闕瑾用事益

貴黨也必中傷以泄舊憾密遣其黨下陝西伺察  
久無所得事遂寢乃攜其服制違例矯旨免官未幾  
太夫人亦捐世五年方禪而瑾誅詔復起補任江西  
以風力名時宸濠逆節未著縱下淫毒壹繩以法民  
恃以無恐楚賊據華林勢甚熾我師數不利與總帥  
都憲王公贊畫竟致大捷六年以功晉山東按察司  
副使兵備臨清齊俗侈靡而臨清尤甚乃教以儉約  
於除戎簡閱之事罔不殫心力爲之雖處宴安之時  
惴惴焉常若寇至狀八年轉雲南按察司一時聲稱  
凜然尋轉本省右布政使十年召爲順天府尹行未

半道遷右副都御史巡撫河南振肅風紀扶植教化  
摧抑權豪屏黜貪墨至有望風畏懾解印綬以遁者  
汴地下濕多河患逋租無算至卽疏聞咸賜蠲免民  
力稍蘇正德丁丑蝗戊寅澇民間大戚老者死壯者  
逃立條約下諸屬郡郡行之州州行之邑祛滅尅之  
弊旦夕與寮屬商處期得善策至終夜繞榻不寐偶  
得休糧方於書笥歎曰天若濟民此方必效吾不忍  
藏乃刊示四路民得此以活者甚衆汴洛故都會陵  
墓在焉盜利其中之所有多被發乃峻爲之禁令近  
居者守護防衛由是未發者始得全時鎮守藉進奉

省虧值市物如古器羔皮之類深爲吏民病徐以溫  
言論止之十三年再徙巡撫南畿尋遷戶部右侍郎  
兼左僉都御史巡撫如故其綏安之方採荒之術大  
都如河南時政而儲運之法裕國之計恒倣諸大義  
叅以民情時稱其便聞宸濠將稱兵犯闕以安慶畿  
輔適當賊衝非得人莫守也值都督楊銳時爲指揮  
使及諸將晨叅於衆中揖而進之曰皖城保障委之  
於子母負我乃奏請使視事而白巖喬公宇時任南  
畿本兵相與協心王室設方略飭武備日以禦賊爲  
念已而賊兵東向舳艫相接氣勢銳甚抵安慶城下

攻具悉備目中已無江左矣充嗣飛檄城中喻以忠義銳感激思奮嬰城固守相機應敵日至數十發無不克捷又潛遣間諜順流而下給云王師百萬四面至矣賊得諜語相顧錯愕城中偵知之士氣百倍鼓譟震地賊敗衄宵遁渠魁就擒武廟幸南畿詔許造膝親賜慰勞論功加太子太保工部尚書仍兼巡撫頃之臺臣言東南財賦甲天下而水利之政久廢不講非常久計詔宰臣僉議下其章於撫臣比受命親蒞其地尋訪淤塞故道多爲勢家所據力任衆怨無毫髮假借不逞者爲謗語上騰冀陰阻其事朝

議復難之充嗣卽建白臣考禹貢水道所歸之由相  
地形高下之殊并正統中周文襄治濬舊跡則功無  
不可成者但恐成功之後不能無疑臣者耳時論牴  
之由是盡心所事不辭繁苦凡椿木畚鍤給賞顧直  
之需取諸屬帑羨餘委廉能官分幹一毫不干於民  
謂冰之枝節多岐而白茅港吳淞江二派最大首興  
事焉自經始至迄工凡三閱月而諸水旋亦就緒人  
悅於趨赴無怨心自是潮汐不憂壅滯淫雨不患汎  
濫蓄洩有道而旱澇有恃食其利者甚博而京儲不  
致於匱乏矣 世廟襲興被詔陳言乃條上新政數

事以正心用賢爲首務識者謂其知大體併嘉前績  
擢南京兵部尚書畜士卒有恩遇武弁以禮有益於  
國家及軍民者率攘臂爲之振刷擄蕩惟懼或後如  
馬快船素爲苦役乃汰其冗者取盈數而止貪猾無  
所媒利此類是也嘉靖丁亥以考績進階正治上卿  
居官清苦自圖書外無長物前後敷歷四十餘年所  
至以風裁自持然外和柔而內剛正以故始終不及  
於禍如閹忠孽彬在南畿恃扈蹕勢凌轢縉紳數有  
要求一切不與卒不能加害自晉尚書常曰大臣監  
止足吾不歸何待累疏乞骸骨蒙 上溫旨諭畱至



子春移疾告歸是年九月卒年六十三謚文簡有  
帶山集奏議水利二稿當江西之變有靖危錄凡若  
千卷藏於家

楊 慎

楊慎字用修別號升菴新都人少師石齋公廷和子  
也慎生而岐嶷穎達七歲母夫人教之句讀併授以  
唐絕句輒成誦慎奮志誦讀不出外戶惟母憂極其  
悲號廢食骨立未幾祖母葉訃聞隨石齋公回蜀守  
制大父畱耕公授以易兩旬而洽不遺一字擬作古  
戰場文有青樓斷紅粉之魂白日照翠苔之骨數語

公極稱賞復命擬過秦論益大奇之曰吾家賈誼也  
一日石齋公與二弟觀畫問曰景之美者人曰似畫  
畫之佳者人曰似真孰爲正慎舉元微之詩以對二  
叔曰詩亦未佳汝可更作慎輒呈稿云會心山水真  
如畫好手丹青畫似真夢覺難分列御寇影形相贈  
晉詩人二叔曰只此四句大勝前人矣時年一十二  
辛酉石齋公服闋慎亦入京師有過渭城送別詩及  
霜葉賦一日偶作黃葉詩李文正公見之曰此吾小  
友也乃進之門下命擬出師表及傅奕請汰僧尼表  
文正覽之謂不減唐宋词人弘治乙丑侍石齋公禮

闈時崔銑試卷在分考劉武臣簾下疑其刻深未錄  
慎見之愛其奇雋以呈石齋公遂擢詩魁崔知而以  
小座主稱焉時年一十八正德丙寅與同鄉士爲麗  
澤會丁卯歸應四川鄉試督學劉丙試而奇之曰吾  
不能如歐陽公乃得子如蘇軾是秋果擢易魁十一  
月上禮部戊辰春試入國學祭酒周玉類試之曰天  
下士也已已歷事禮部尙書劉宇見慎問曰子爲誰  
對曰楊慎劉曰子固天下士豈必一大臣子弟耶乃  
稱歎不置辛未禮部會試靳貴擢慎第二殿試則及  
第第一制策援史融經敷陳弘剴讀卷官李東陽劉

忠楊一清相與稱曰海涵地負大放厥辭共慶朝廷  
得人授翰林修撰時年二十四癸酉丁繼母喻憂明  
年藍鄆諸寇作愼在邑城中日夕戒嚴有賊數百詐  
稱官軍以紿門者愼率守雉堞者詰之散去乙亥服  
闋冬十二月北上丙子入翰林爲經筵展書官及校  
文獻通考丁丑爲殿試掌卷官得舒芬策以呈閣老  
梁公乃得首第時 武皇遊幸宣大榆林諸邊返而  
復往愼疏切諫不報乃以養疾乞歸庚辰九月愼北  
上仍舊官辛巳四月 世宗皇帝卽位五月愼爲殿  
試受卷官八月開經筵愼首作講官進尚書金作贖

刑之章言聖人贖刑之制用于小過者冀民自新之意若大姦元惡無可贖之理時大閹張銳于經等皆犯先朝事罪當死以進金銀得免故及之壬午二月命慎代祀江瀆及蜀藩諸陵寢著江祀記與給事熊浹御史簡霄遊浣花溪載酒賦詩有煙霞誰作主魚鳥自相親斗酒千金會扁舟兩玉人之句十二月北上復命癸未纂修 武廟實錄慎練習朝典事必直書總裁蔣冕費宏曰官階雖未及實堪副總裁者乃盡以藁草付之刑定甲申七月兩上議大禮疏嗣復跪門哭諫中元日下獄十七日廷杖二十七日復杖

之愼整而復甦謫戍雲南永昌衛時同事死者配者  
黜者左遷者二百八人愼舟由潞河而南值先年被  
革挾怨諸人募惡少隨以伺害愼知而備之至臨清  
始散去時年三十七乙酉正月至雲南病馳萬里羸  
憊特甚栖栖旅中方就醫藥而巡撫台州黃衷促且  
甚愼方疾冒險抵永昌幾不起巡按郭楠清戍江良  
材極爲存護卜館雲峯居之且上疏乞宥議禮諸臣  
郭亦被詔下獄斥爲民丙戌九月聞石齋公寢疾疋  
馬間道十九日至家石齋公悅而疾愈七月携家就  
戍所十一月尋甸府土舍安銓變起十二月武定土

舍鳳朝變亦起攻掠城堡爲患慎歎曰此吾效國之  
日也乃戎服率旅僮及步騎百餘往援木密所守禦  
入城與副使張峨謀固守明日賊來攻城寧州土舍  
陸紹先率兵戰城下慎促城中兵鼓噪出以助外兵  
賊敗去慎復歸會城戊子春慎一足病有半人嘲鑿  
齒一足笑虞夔之句己丑八月聞石齋公計奔告巡  
撫歐陽子重疏上得歸襄事十一月還滇壬辰正月  
布政高公韶聘修雲南通志時鄉大夫有欲冒嗣潁  
川侯傳友德以覬世爵者慎不可乃乘張羅峯復相  
流言欲中之慎遂去庚子八月巡撫劉太謨聘慎及

王元正楊名纂修蜀志辛丑還滇至東瀘疾作尋戴金畱之返成都壬寅七月還戍所丙午冬大理推官吳宗徽署安寧州奸規州利欲權民鹽牛慎言于當路得免丁未居高嶢水莊名十二景日與交遊倡和凡招提佳勝會意處便操觚畱題數與滇之鄉大夫遊昆明池有詩社集壬子二月時在逸武弁得委祭龍海口歸肆狂惑請丁夫六千督往注濬剝衆利州人苦之有言於慎者慎歎曰海已涸矣田已出矣民已疲矣致書巡按趙炳然罷之九月復至瀘己未春還戍所六月遘疾卒年七十有二丁卯 穆宗卽位



遺詔追贈光祿寺少卿慎孝友性植穎敏過人家  
學相承益以該博凡宇宙名物經史百家下至稗官  
小說醫卜技能草木蟲魚靡不究心多識闡其理博  
其趣而訂其訛謬正德間武廟閱文獻通考天文  
星名有注張內閣取祕書通考又作汪張中使下問  
欽天監及翰館中皆莫知爲何星也慎曰注張柳星  
也歷引周禮史記漢書以復又湖廣土官水盡源通  
塔平長官司進貢同官疑爲三地各于長官司上添  
一三字慎曰此六字地名也取大明官制證之嘉靖  
初給事中張翀上言時政論學術不正一條有商宇

魏瑣之語

上問之內閣慎適在館中卽取荀子非

十二子篇以復敬所蔣公喜曰用修之博何減古之  
蘇頌乎乃若論王導之賊晉室辨太王之非翦商魯  
之重祭不始于成王周公春秋五伯深斥乎楚宋秦  
繆引墨子及修文御覽以辨范蠡無載西施之事引  
黃泉發蘇東坡之言及李漢韓文序以辨文公與太  
顛書之僞駁歐陽氏非非堂之說傳節婦唐貴梅之  
死此又證據古今闡揚幽隱謂其有功世教也非乎  
至若陶情乎豔辭寄意于聲伎落魄不羈又慎所以  
用晦行權匪恒情所易測者也昔重慶守劉繪貽慎

書曰夫人情有所寄則有所忘有所羈則有所棄寄之篤則人無所忌無所忌而後能安無所安而後能適足下所爲蓋求其適與安也古人買田宅擁聲伎皆豪傑蓋世之才豈獨抱尺寸者之見也僕觀足下自蒙難以來嘔心苦志摹文讀經延搜百氏窮探古蹟鑿石剝泐破塚出遺忘有僻儒苦士白首蓬蒿日事纂索所不能盡而謂竭精蕩神於逸欲聲色者能之乎斯言也可謂諒愼之深者也愼嘗語人曰資性不足恃日新德業當自心力中來故好學窮理老而不倦平生著述百餘種

王汝舟

王汝舟字濟川別號時齋成都府華陽人少而穎敏乙卯舉于鄉正德戊辰登進士爲句容令三載徵爲江西道御史爲巡視陝西茶馬遷爲山東按察僉事整飭武定諸路兵備已卯以內艱去起復補陝西僉事癸卯秋遷爲布政司叅議分守涼州諸路丙戌遷爲雲南叅政分守金滄道已丑遷爲貴州布政左轄至有賢聲鞠躬盡瘁嬰疾卒其令句容則百廢具興六事克舉其爲御史則激揚風紀其巡視茶馬則茶利均布馬羣弗逸其爲兵備武定則戎務咸理巨寇

以平其復僉陝西保任鳳翔兵備則斬木通蔽訓兵  
督捕以遏關棧聚剽之寇其爲叅議則儲峙以足供  
餉有方羨餘三千悉備公儲其爲雲南叅政勘木邦  
之夷奪三酋之氣還金牌土地歸之版圖其爲貴州  
左轄破姑息之說勵振刷之氣以消邊患練兵防守  
會計芻糧以定川寇周天星之亂蓋自筮仕二十四  
年節操冰清賢能茂著才不究用賁志以歿始終生  
死以順以正可無遺憾矣

熊允懋

熊允懋字士勉資陽縣人正德辛未進士嘉靖癸未

陞浙江水利僉事往者豪強多侵水利致妨農業及  
允懋至嚴爲之禁諸所據於豪大家者悉加釐正以  
業貧民俗弊頓革不畏強禦杭有貴勢挾長欺孤而  
佔其產允懋一鞠得實力爲直之勢家祈請不已堅  
拒弗聽輿論快然踰年以憂去

張潮

張潮字惟信號亭溪更號玉溪內江縣人年十二携  
從父任游學於內翰劉五清之門恒讀書踰夜分母  
恐過勞戒之甚嚴藏燈帷中默誦不輟父器之撫其  
背曰兒他日必亢吾宗越正德庚午舉於鄉辛未連

進士入翰林爲庶吉士癸酉授編修甲戌充會試  
同考試官教書內館丁丑請假歸省庚辰復任嘉靖  
辛巳充經筵展書官壬午預修武廟實錄乙酉陞侍  
讀充經筵講官實錄成陞司經局洗馬賜金幣丙戌  
充殿試受卷官丁亥陞侍讀學士兼日講并撰誥勅  
日錄國史時上方銳意文學日進儒臣講論經史潮  
舉動閒整敷說明鬯每心識之明年戊子主應天鄉  
試初下詔變文體就切實殫心校閱務得名士梓文  
詞達理到士服誦其言己丑充殿試讀卷官庚寅奉  
詔與議郊祀禮羣議分合相半潮據經引史旁及子

集斷以祖宗之舊反覆辨論幾及三千言大約謂禮之可疑者八難行者二一曰合祀之說雖證以昊天有成命詩序而其詞却又專頌成王分祀者不過援周禮奏樂於圜丘方丘數語而北郊則僅創自漢儒標取孝經緯文天神主北辰地祇主崑崙殊爲荒謬二曰六經有祭法有祭天泰壇祭地泰圻之語而亦無南北郊文唐賈曾表引春秋說王者一歲七祭天地合食於四孟王肅述孔子云祭天而地配於經皆無所據三曰易殷薦上帝以配祖考舜典止肆類上帝及祀六宗山川羣神周禮以禋祀昊天上帝以實



柴祀日月星辰而司中司命風師雨師社稷山澤四方百物各以物祭及月令凡祭祀亦斷自昊天上帝山川四方宗廟社稷之神而俱不及地豈地道從天與中庸所以祀上帝之文同乎四曰禮言郊禘或言郊廟或以社對帝或以社對郊釋之者曰言郊以知社稷之在國言社以知郊之爲天地亦無的確五曰祭必有服掌王之吉服祀昊天上帝服大裘而冕享先王先公祀四望社稷五祀羣小祀各有服冕何祀地祇獨無若同大裘則非夏至所宜六曰祭必有配祭義云郊之祭大報天而主日以配月孝經云郊祀

后稷以配天何北郊獨無配乎七日朱熹嘗言古時  
天地定是分祀却又曰五峯言無北郊只祭社便是  
此說却好似亦矛盾八曰陰陽之義多矣如祭統以  
郊禘爲陽義以嘗蒸爲陰義則曰祭日於壇祭月於  
坎以別幽明以制上下何天地獨無陰陽至若周禮  
一歲九祭天朱熹所謂當時禮數簡儀從省故易行  
者是已今於天歲止一祀而春秋旣祭社以專祀方  
丘則反崇地抗天非尊卑相承之道此難行者一也  
且周正建子故二至祀天地於歲事爲不紊今歲首  
在寅不從二至非順陰陽之義從之則於序有乖皆

不合周禮此難行者二也惟聖祖時合祀已久雖其  
列壇從祀非古而當時著令命官分獻各以義起殊  
與漢晉唐宋神座十數百位者不同今不若循舊爲  
便時上志先定分祀覽其言懇切婉盡亦不以爲非  
未幾南郊創造園丘都御史汪鉉請槩遷禁垣外冢  
墓上不忍盡遷限一里之內而止亟上疏曰此正陛  
下不忍人之心發於至誠遠符文王澤及枯骨之德  
惟壇去外垣尚遠一里之內墳塚不下千萬餘區倘  
若於瞻對無妨悉容仍舊其恩尤溥疏下內閣執政  
者詰謂褻穢園丘匪宜潮應之曰在園丘似褻然天

無不覆卽遠遷何所逃詰者語塞竟得旨罷自是直聲隱隱起朝著間矣辛卯陞翰林院學士掌院事尋陞詹事府少詹事兼學士掌府事壬辰聘主會試先是常念母淑人年高邁疾三疏乞歸侍養不允會陞吏部右侍郎益歎詫不懌曰忘親以戀官非子也復抗疏恟迫始獲允命給驛以歸入門三越月母卒賜諭祭一壇服闋丙申用薦起復吏部右侍郎丁酉轉左仍兼學士與經筵日講己亥加秩太子賓客充官僚辛丑再掌翰林院事教庶吉士壬寅陞禮部尙書掌詹事府事教庶吉士兼官如舊上疏辭讓詔褒答

之不允辭 上覽詞臣文字最難許可惟潮受知素  
深屢遣分獻陪祀其獲金帛錙幣之賜不可勝紀至  
嘗應制和上奉聖母遊覽有詩賀嘉禾瑞麥慶雲靈  
鵲有賦賀瑞雪甘露瑞兔有頌賀時雨時雪有疏每  
被稱賞自元老而下眷遇之隆罕與儷者年六十卒  
器度凝重與物無忤而中有介然不可拔之操自少  
卽能詩文讀書過目輒成誦尤工楷書入翰林後詩  
格益高文必根極理道不專尙華藻有玉溪稿若干  
卷藏於家

趙貞吉

趙貞吉字孟靜號大洲內江縣人生而神穎六歲誦書日盡數卷年十五讀王文成傳習錄驚曰予固疑物理之遠於本也今獲所歸矣白二親往從不許遂遍誦六經自求之嘉靖戊子甫卿薦走謁故相楊文忠里第文忠稱曰是社稷器也明年下第歸大夫人逝泣曰人世魔忽若是遂兼修出世業習靜古剎不櫛沐解衣者數年父資政公強令赴試舉禮部廷對都御史王公廷相撫其卷曰雖治安策弗能過也上嫌其語直置二甲尋悔之乃首列庶吉士特旨畱館授編修上初年銳意聖學後稍惑方術遂上求真

儒贊大業疏執政不擇貞吉日與同志徐樾輩切磨  
踰歲謁告歸蜀爲多士發明大學致知本旨蜀士始  
知問學出于咕嚕之上二年冊封三年教司禮監同  
修會典充會試同考試官又三年遷右春坊右中允  
管國子司業事當此時天下士高者固守物理紛若  
射覆一聞知本之學反加詆訾於聖門性道之旨莽  
如也慨然嘆曰學之不明未知性也進諭六館士首  
揭中庸性道教爲訓諸士聞之懔然舊習若濯而新  
是歲爲庚戌乃語當事者曰虜將大舉盍爲防禦計  
八月虜果闌入古北口由通州薄都城上破虜疏是

時虜方有求貢嫚書入朝 上詔禮部尙書徐階集百官議日中莫有發一語者獨出大言曰城下之盟春秋恥之且旣許貢則虜必入城要索不已卽内外夾攻胡以禦之徐公曰足下必有奇畫貞吉曰爲今計請 主上出御正殿下詔引咎錄周尙文之功以勵邊帥釋沈鍊之獄以開言路輕損軍之令重賞功之格飭文武百司共爲城守遣官宣諭諸將監督力戰其他無可爲者 上已偵知其言手詔嘉其壯猷陞左春坊左諭德兼監察御史領勅宣諭并給帑銀惟所措置然勅未有督戰語可統攝諸將以行也因



請于相嚴嵩嵩故有卻又其黨趙文華素銜之冀  
相齟齬而甘心焉故不與事權卽兵曹一護卒不可  
得時虜騎充斥單騎出城先詣總兵仇鸞營次過諸  
將宣上旨激勵付賞功銀一時將卒感奮惟趙國  
忠一營駐沙河隔虜則屬鸞傳諭而貞吉以詰朝入  
城復命方貞吉之入也仍欲上請督戰已撰有疏草  
矣而鸞陰畏之至遂令人請備膳疏故爲遲之入朝  
趣疏不來獨以宣諭事畢奏上上怒謂貞吉領銀  
未覩措置第爲尙文鍊遊說詔錦衣逮杖落職補廣  
西荔波縣典史癸丑量移徽州府判稍遷南吏部文

選司主事未至進郎中乙卯陞南光祿寺少卿遷南  
通政司叅議先是嵩已嗾吏部推以藩叅因上問  
趙某何在故有是遷丙辰陞南右通政明年陞南光  
祿寺卿聞三殿災乃移書執政言大工復作不宜加  
賦困民嵩見大忤又三年乃陞南戶部右侍郎時已  
聞訃歸服闋改戶部右侍郎抵任上屢遣代祭示  
優眷嵩滋不樂亡何有建議薊州增設戶侍一員督  
糧練兵者嵩以屬之且召之酒詭曰是行非公不可  
貞吉曰人臣之義死生以之復何諉哉酒半徐曰今  
欲戶侍督糧督京指揮運乎抑民運乎若二運已有

職掌卽部中與出薊州何異添官徒增擾耳況兵之不練其過宜不在是縱十戶侍出無益練兵也嵩作色怒且罷適嵩在告上手詔次相徐公問薊州事徐對以查理當用習邊糧者吏部因得易管理爲查理而以林侍郎行嵩出愈忿而詬林侍郎嗾其黨張給事益劾林不數日并劾貞吉竟奪官去貞吉持論以二氏學通吾儒謂必出世乃可經世論汴遊嵩高抱犢伏牛諸山巡撫蔡公汝南逆而問學遂列爲圖明三教之所繇起曰儒者見之曰儒仙者見之曰仙佛者見之曰佛其實一也蔡梓以傳家食多居玉溪

莊嘗爲諸生申致知之旨又爲講說人心道心精一  
執中大要以中卽性命卽天則也而後儒乃不識中  
爲何物至以爲物物有之是有同於刻舟之愚雕形  
之苦殊失其旨丙寅 肅皇帝崩隆慶改元詔起吏  
部侍郎兼翰林院學士掌詹事府事實錄副總裁會  
有言幸學祭酒坐講當預擇耆德攝之遂奉 旨以  
原官暫掌國子事八月朔 駕幸學賜坐講禹謨后  
克艱章 上見其闡發精明音吐洪鬯大爲感動問  
之知爲新起用臣益喜尋命解監事充日講官先是  
北虜陷石州貞吉與執政數議邊事不合乃求補南

書旣行御史李惟觀南戶科給事岑用中交章言  
趙某居啓沃之任可以格心贊治不宜置遠地復以  
禮部尚書兼翰學協管詹事府事戊辰三月還京會  
文武邊臣建議欲招練南兵十萬于張家灣力執不  
可曰曩南京建振武營致大變今乃欲建十振武營  
於都城側哉況燕薊乃戎馬場豈藉南兵當事者寤  
遂移練兵于薊鎮惟練南兵三千教烏銃識者謂爲  
得算頃之奉 命教庶吉士仍充講讀纂修又命代  
祭先師孔子爲 皇太子千秋講唐太宗喻太子童  
賜資無虛日時薊鎮奏修敵臺幾千座以爲徒費無

裨戰守因講語中力言之語具爲執政格不得上遂  
邑懷去志而 上之眷用意益切尋詔以原官兼  
文淵閣大學士同諸臣入輔大政一日于講筵謝  
上面諭盡心輔佐時 上多恭默而面諭之者再辟  
臣謂自臨御以來所未有翌日御便殿手詔閣臣謂  
貞吉已有年當同任閣事又撰勅令中貴捧詣閣下  
皆特典也先是大同邊臣棄城走爲巡按暨科道所  
叅而閣臣未有言治罪者貞吉謂宜照元年山西失  
事例治之執政不得已乃行巡按覆勘爲是遂註籍  
不出 上聞溫諭遣醫賜羊酒瓜果感 上睠注乃

上疏乞解贊輔重任退供講職且言大同之罪惟祖法國是公論清議八字勘之足矣今兵部與閣臣俱仍姑息臣欲爭論而力不能故懷慚思退 上亟慰畱之是日 上以原票還閣中改擬有不襲昔年虛套之論而閣中猶以將才難得題覆 上姑兩解之然信任益篤明年庚午上言遵祖制收兵權以飭戎務略云我朝內外兵分隸五府乃 高皇帝定萬世太平計免前代權臣握兵之害永樂末年因聚府兵北伐旋師後遂結營團操乃以三千神機二營附之因號三大營其實皆五府兵也正統末年嘗變爲

十團營弘治間又加爲十二團營正德間又添署東西官廳然五營之號未泯而五府意猶存也至嘉靖庚午嚴嵩欲爲賊將仇鸞地遂請特設戎政廳括內外兵籍鑄總督戎政印授鸞夫以五府外而別立一廳則盡變 太祖分府之意以十餘萬衆而統於一人則盡變 成祖分營之意向使鸞誅或晚時事之危未可測也合無將見操官軍九萬人分爲左右中前後五營各擇一將統之責令開營教習仍以文臣巡覈之每歲春秋校閱凡將官能否軍士勇怯技藝生熟皆得奏 聞而賞罰行焉要令五營齊成精銳



有事則領勅將兵於間外事畢則納印歸卒於營中  
如是則太阿之柄獨持於上而輦轂下有數萬精兵  
隨所用而可矣 上曰分營練兵乃 祖宗舊制遂  
下廷臣議行時本兵兵科挾前大同事議遂蜂起反  
失建白本意 上以貞吉兼掌都察院加太子太保  
時閣臣高拱兼掌吏部方欲挾權籠制諸臣意假爲  
分謗地故推之兼掌院事已而本兵霍冀被科臣論  
劾賊私疑前議大同及已乃於求退疏中誣貞吉主  
使疏辨欲付法司究問以糾官邪且兩上疏乞休  
上不允乃請給假回籍遷葬不允拱尤銜故相徐公

欲中以危法疏言當時議事臣假托遺詔凡 先帝  
所斥如大獄及建言得罪諸臣悉加超擢死者贈官  
廕子是仇視 先帝近於無君又引弘治間彭程事  
欲有以治之貞吉拂衣起曰若是則將如宋奸黨碑  
矣拱色變強畱乃共改票止於吏部通行曉諭而已  
拱以是迄不得逞於徐公後又以故錦衣陸炳爲徐  
姻家已嗾張御史追劾炳而刑部以炳一品爵例在  
應議例當請勅三法司集議定之奏下閣中擬票是  
日拱遲貞吉久不至遂徑擬削爵沒產自是拱與貞  
吉勢不兩立矣亡何宣大督撫王崇古等奏俺答孫

把漢阿吉等入降貞吉曰大約浮言謂恐開邊釁然  
自俺答橫行五十餘年每年邊餉數百萬何年無釁  
釁不在納降也惟當請暫與降人官職慰來者心其  
制虜機宜一付之督撫乃同改票卒如貞吉言亟令  
督撫姑置封貢事徐議之第令俺答速獻投虜叛人  
趙全等九人易其孫去且當慎交質防虜劫盟又貽  
王書曰吾外憐悉恒謀之附人內恐李文饒之失助  
其爲邊計篤切類此先是給事中張齊者爲拱巖劾  
徐公而主都御史因訐齊賊罪抵戍後齊倚拱辦復  
力擊王與毛司寇欲因以傾徐乃奏行法司而刑科

給事中舒化叅寢不得行拱懷怒思一逞於是考察  
科道旨從內出貞吉曰是將倚法爲報復計也疏請  
止之拱聞卽上揭謂有成命不當中止遂同赴吏部  
有給事中吳時來者故嘗劾嵩父子謫戍起用守伉  
直不附拱者也拱銳欲去之獨不可爭至日中拱知  
其不可奪從之以故事省之得全者衆然拱益恨且  
刺骨嗾心腹給事中韓楫枉誣之疏懇乞歸以明年  
春抵家諸門人請設教聖水寺會 穆宗大漸哭臨  
至哀毀成疾乙亥遂杜門不復會講第擬作二通遺  
諸門人內篇曰經世通外篇曰出世通二通各分二

內篇門曰史通曰業通外篇門曰說通曰宗通內  
通之門八部而百代九流之緒備矣外通之門四部  
而頓漸半圓之旨悉矣欲俾三千年未經折衷之籍  
聚爲一書以俟來哲是歲十月卽開局編述乃爲文  
祭諸聖賢告始事至冬末疾作輟編丙子三月薨春  
秋六十有九訃聞 上諭祭贈少保謚文肅孝友天  
至從總髮與弟蒙古自相師友剛忠英偉稱其氣貌  
解褐卽身任天下憂先一世雖百挫不回至其問學  
淵源上探堯孔之微而博辨雄深要歸于道所著詩  
文若干卷進講錄若干卷行于世

周滿

周滿字謙之蜀之廣漢人生甫六歲遣就外傳穎異  
絕其儕嘉靖壬辰登進士授南京戶部主事時年二  
十有五南戶曹務簡始蒞事卽明作自勵指揮某者  
造僞領以冒官儲遂劾而置之法尚書異其少年練  
裁進之本科凡制置奏覆倚以斟酌可否逾年監督  
浦子口更益植學尋莊定山讀書處拜其墓葺其祠  
刻其遺集於邑齋旣還都聞高陵涇野呂先生躬行  
君子也內修外文進止可範乃折節事爲師朝夕聽  
其討論退而証諸寔廸以自稽省事必求無忤於夢

終乃已與諸友僚會業於南都名勝如鍾阜鳳臺牛  
首獅峯靈谷等山諸名刹各有會所分經子史漢晉  
唐詩爲課限首以交核行藝相質迎養父南山翁暨  
母夫人于京邸夙宵必冠帶入子舍候省爲常日令  
內人市江魚浙酒爲供具酒數行輒高吟座隅吟已  
起舞當彈吹班綴之樂二親懽甚忘其在客月一赴  
山寺之會必稟白乃行至則各校課程勤窳旬餘乃  
罷戊戌擢雲南府知府雲南爲會府輻輳至則慎守  
官箴承馭一循事矩刻廉自喜滇海地獨下洩水之  
口隘甚沙泥易淤衝躍四漫濱海腴田歲收不上數

千鍾公私俱病甫入境民遮道自言其苦遂力白監  
藩承檄往視循阡達觀果如民訴喟然曰是可畏上  
嗔而貽民嗷嗷乎今惟省役費易府佐督之不易畢  
事乎乃條濬海口之利與不濬之害畫圖述策以上  
尋檄同知濬治如議於是淤積漸去海田歲大有獲  
公私供需咸資爲長利矣逾年遭母夫人憂去癸卯  
免服補守鞏昌力行教化務在敦琢而休煦之首選  
學官第子經學道義有師法者列之便座右授經書  
訓以性命人倫之要學必由橫渠以志於聖人治必  
法三代爲條教使各歸教其鄉里務種藍田鄉約之



人以藍田呂氏橫渠張子皆陝人也鞏民由是知嚮  
往二賢尤注意於孝子貞婦鰥嫠獨貧介之儕里  
表戶矧隴民關世安獨居養母母沒廬墓三年恥從  
人勾貸年三十二未能娶聞之捐兩月俸資予世安  
置妻舉人陳爵能文死無葬具母妻靡依乃爲爵完  
葬具復旌其母妻計日給以廩著爲則爵妻得養姑  
終身生員許國忠楊熠等貧不能葬親舉人何遷等  
無居各力爲處給熠等始獲居食國忠父母得不暴  
骨淺壞其喜賑寒瘁類如此又訪遐村孤耄得數十  
人時其寒燠處其粟布病予醫藥間有獻饋肥鮮不

入私邸割以頒之弗遺一老以故歲入俸餘亦緣手  
盡跡睚眦武斷白徒一一寘之法馭屬吏寬平有威  
不忍褫其巾衣扑之然嘗洞其陰伏受取雖一錢以  
上無能匿吏救過罔暇孽賊趙廷學暴聚亡命剽掠  
鄉邑長驅抵輦急圖殪之會羣盜暮夜趨輦北匿小  
城旅舖中密遣力士環而圍之別添兵扼其歸路北  
明俱就縛乙巳擢廣西按察司副使去後關孝子生  
子名之曰周父以誌世感輦人思慕不已胥造胡都  
御史纘宗所請立去思碑文至此之文翁冠恂朱北  
海龐仲達云比赴廣臬廣右多峻山而府江蔽谷連

洞尤易藪盜徭徠民賊盤穴其地者十之八賦役之  
民不及一二山南三洞賊尤雄獬常伏箐薄中候官  
民船突刼之平樂李進邦陽朔陸公眉富訓劉荷勝  
皆民賊之崛起者也動率千數人互出橫刼官庫城  
獄多所侵剽又倚險爲巢跋扈甚往年制府先後雕  
勦之俱不獲一矢而還始至平樂卽思殄寇必先養  
兵養兵須同甘苦遂減膳省役開誠布公日閑其兵  
而練之閱五月而兵可用乃遣人齎花幣招撫尋陰  
部所練兵夜斫其巢斬進邦首焚其穴兵勢漸振復  
謂荷勝嘗奪縣民女新寡有色者專寵之乃繫女父

譙之以婚賊當死于是誘至其家勒兵擒還其女於父公眉始懼請撫度眉不可鵬勸廉得其甥婿史媚在陽朔爲其耳目謀眉藉得先備以逞乃誘繫其甥婿與之百金恣其出入令千戶朱臣授以秘計是日東下梧州示遠出以弛其備令壻治具山寺請眉眉素善筮以筮凶不往月餘復令壻申請公眉重違其意厚甲重鎧率精騎來會潛伏精兵於徑公眉受擒從賊四百餘人皆麋散徭僮股慄不敢近陽朔戊申丁父艱歸檢發其行貲止兩木篋貯衣數襲俸銀莖莖五銖而已張侍郎岳聞而嘆曰昔軒尚書輓爲按

察使歸蒲僅二竹箱出門比聞外訃次日遂行識者  
謂爲純孝今何如周副使之行不停晡也庚辰補山  
東副使專驛傳屯田水利已改督宣大五鎮邊儲尋  
赴各鎮盤閱軍儲鉅而帑廩微而絲忽合勺綜覈如  
制參論總兵都指揮使以下侵隱諸罪邊鎮肅然復  
與智帥才臣素著勲名者咨以戰守攻御之宜堡徼  
築設之備與練習慰帖賞罰信必操切之方酌裁於  
心退則識之於帙嘗誦劉絢募兵不如養兵擺邊不  
如合戰數語乃上疏言幾旬所病今在民兵北直素  
多武勇騎射之士操練本土不以爲勞調戍薊州不

以爲遠風土相宜音問相及恒有激烈求試之意山東歲調宣大其人粗悍猛厲不難就死河北義士忠勇素稱山西近邊之民身親戰鬪但選材有方未可槩取乃若南直隸者脫粟之飯不能下咽沙磧之場不能張目一馬裹裝重不至百斤一行蹊跚趨不能百里况望其摧鋒破敵鼓勇立功乎爲今之計無如畱北直隸民兵平居操練遇秋應援其山東河南山西者使相幫貼以俟後處一以蘇徭戶之困一以精武士之選至於南直隸者勢須槩罷但解支費以給一戍是以兩省給一軍兩人併一騎也以壯爲衆以

飽爲逸計莫便於此 上率用其言明年癸丑陞山  
西叅政駐節靈武是時俺答大發犯渾源將闖紫荆  
窺京師我師防禦甚急滿提兵覈餉夙不假寐旋議  
援應方略申飭將領濬修池隍日校武士部勒行陣  
擇其梟俊者閑之使兵將識情人精慣藝其有能隕  
圍陷陣引射命中寇至能騎戰牆立衝突弗動者爲  
材勇賞不移時否則撻戮隨之士益鼓勇思效七月  
虜犯紫荆督戰廣昌虜遜不敢度關冬虜又入寇督  
兵血戰獲級九十捷聞加賚白金十兩明年秋再犯  
麥川將士受餌總兵李涑馮叅將李遊擊皆死焉朝

議洵洵後知餌將違分守計畫罰俸三月滿感 上  
恩蒐討羣策陳略輯兵志必死綏而頸虜酋爲報甲  
寅轉雲南按察使雲南習俗仍夷熨惟南理臨安近  
華土珍具充盈吏於其土者多懟遠惕居懷日暮塗  
窮之計類浮沉乾沒思滿橐而去至則置墨綬之貪  
婪者于法罷斥諸債帥庸弁之剝軍侵餉者憲度振  
肅關寄一切不行乙卯轉陝西右布政使攝篆事屬  
歲大侵冬地大震崩山頽陵民屋裂陷水泉飛湧水  
盡火出千里丘墟存者驚於訛言奔走蹂躪不逞之  
羣乘時稱亂府以下倉皇避匿單車徧視緝不逞魁



木然數人械之市須臾亂定已乃請於撫巡發帑儲廣賑恤捐俸資卹死喪嚴儆巡邏弛徵役以軫時艱清繫囚以蘇淹獄修頽城敗庫藉工作以寓救荒停公宴雜會省繁費以助窮匱復選廉吏四出問遺關中父老災縣筑獨受賜安堵就業如常丙辰轉山西左布政使覩地否時艱弗獲展布又以在陝支變過勞成疾上疏乞休不允明年右副都御史巡撫汀虔四省提督軍務時岑岡賊李文彪賴清規等越境劫殺火人廬舍故遂下令團操專事閒練登場校藝選有心計者爲帥演練各卒又且懸購賊首優待材官破

格賚予不局常條文彪等聞之懼而稍戢而大埔上  
杭賊首王子文梁能等亦以次勦平是時兩僉事函  
賊首或牽縲反接獻誠軍門滿乃緣虜寇兵興顛末  
研覈功罪浮實及有司將領勇怯效驗具疏以聞又  
見虔寇淆出無時兵壯素瘁骹乏技衛弁雖衆大半  
乳豎庸闇緩急難倚藩司又多員缺一人嘗攝守數  
道復疏請於所轄嶺北嶺東漳南嶺南四道並各專  
設分守一人以叅政或叅議任之請復如成化中例  
仍設叅將於會昌節轄四省蓋分守專設則期會可  
必緩急胥倚擬議叅將節轄則職有統紀儻臨叵測

則以有制之兵加之烏合之孽如舉匹雛爾部復所  
請各專設分守如議任未暮力疏病乞休而去去之  
日猶黽黽措設所奏協諸宜以貽來政爲人忱恂足  
智愷悌朗爽特甚一聞涇野先生躬行之說專以四  
教三省爲存主務日有可見之業爲尊聞行知嘆世  
儒徒嘒嘒認識本來反泐洋而無益於歸宿也平生  
靡疾言厲顏忘人怨謬嘗言甯成居人上操下急如  
束薪此傲酷安能化人所至倡下吏以公廉相砥感  
以至誠遇有咨稟遣委霽色待之語次尋繹叅問輒  
轉以相諏證使各竭所蘊悉對未嘗折逆間有負之

罰亦必行然終無叱咤相加其有賊不入身能懲前  
自淑者反爲枚拭灑過故下吏咸思飭勵爲報有急  
輒以聞素精敏吏事手所出奏疏卷移皆文理縝密  
不可得反然深以網絡詭虔文致人爲惡歷滇粵秦  
晉吳楚宦跡幾週海寰然動嬰事變艱大嘗以身當  
利害屢立戰功議邊儲折色嘗賦新則與廟堂爭可  
否而卒從其議東魯靳學顏曰公不爲抗激之履雄  
駿之辯卮言而裁羣議之端酌行而趨者則焉修古  
文詞惟冥契神理而生色乎自然之質不掇其英而  
芳不和其味而調蓋翩翩溫恭君子哉所著有古文

詩賦奏議家譜二百餘卷爲楊升菴所選有文集有續集行世

齊 準

齊準字平甫成都人賦性公直理學深潛事繼母待諸弟以孝友聞中嘉靖辛丑進士任戶部主事調停國計嘗委濟邊儲未幾三疏終養給困施貧族多不能婚喪者悉勉力代之甘淡薄厭勢利長於文翰名重一時每以道義作人里族子弟造就居多鄉評首稱焉壽八十卒之日有見其峩冠博帶如雲擁而去者咸以爲登仙云

何全

何全字原學成都人登嘉靖中進士自少以文學孝行稱歷官江西叅議有惠政時濱海倭患亟全以身任事追劇寇於南隩平倭夷於蘇常且奏減歲租以蘇民困民立生祠祀之以直介附言官忤權貴乃引歸養重絕跡公門士論益重之

周冕

周冕資縣人嘉靖進士任御史疏請虔祀太廟慎選銓曹俱蒙採納又請東官講學以端國本降雲南典史尋陞兵部郎中劾嚴嵩父子冒濫軍功力救楊繼

盛寬廷杖爲民 穆宗登極推太僕少卿以父憂歸  
卒于家

### 陰武卿

陰武卿字定夫號月溪內江人生而岐嶷七歲卽能  
爲文年十五補邑學弟子員嘉靖乙卯領四川解士  
額丙辰連第南宮成進士初授南戶部主事丁內艱  
復除刑部陞員外郎甲子陞陝西提學僉事丁卯江  
西右叅議分守九江戊辰轉本省副使尋督學廣西  
壬辰福建左叅政甲戌江西憲長丙子陝西右布政  
尋轉左兩推南贛保定巡撫皆不授繼推南京兆始

授己卯典試事闡中轉太常卿壬午奉勅巡撫保定  
癸未以左副都佐內臺理院事轉兵部左侍郎尋右  
卽轉左乙酉陞南工部尚書丁亥改兵部奉勅叅贊  
留樞機務戊子夏偶一疾竟不起享年六十武卿由  
郎署至八座居官若干年事當爲未嘗不力于爲其  
或不當爲也亦未嘗輕于爲初爲郎刑部三尺法奉  
惟謹兩爲督學使者所至能得士分守九江鄱湖故  
盜藪賴壁畫一時江壖如淨練焉在廣西署臬篆則  
贊佐督撫殷公平徭獐在閩則與叅將俞大猷平倭  
亂于興化兩皆受 上賞繼總憲江右則黜貪墨抑



豪右貞度肅僚忌者不能中傷其歷左右轄以旬宣  
關陝也通民利而錢法大行屬歲稔又大著勞績于  
荒政因星變修省考求利弊十事一曰給戶由二曰  
定本折三曰謹收支四曰議儲蓄五曰清虛糧六曰  
覈屯課七曰清驛傳八曰備邊餉九曰辨賢否十曰  
嚴吏卒議上兩臺盡措之于行又能贊佐督撫董公  
殄除妖賊以白蓮教惑衆者太常卿奉 上耕籍田  
交天祀地謁陵享廟事事循典故行無失禮前後蒙  
賞賚有差撫保定則勦平劇盜行劫鉅鹿新河間者  
又以清丈田糧議處賑恤清理河道湮塞申飭三關

墩堡處欽蒙叙錄賞賚甚多而權璫之藉沒嚴覈惡黨馮保等財產無敢一有寄匿者轉兵侍則督修慈寧宮兼督壽宮工程又運籌遼左有功滇南緬捷與有功而科臣兩閱保定邊竝亦奏其邊功蒙叙優賞爲大司空于南也應詔敷陳八事織造則議減免拖欠則議蠲免物料則議暫免以至議寬造器物議查復梭薦議改折皮張乃若杉楠花梨等木議停解停取種種皆爲國爲民之言後因僨運糧儲而敷陳五事也一講關防以肅漕輓一查工匠以濟工作一覈底船以杜推諉一慎僉選以嚴責成一清船號以

便催僨此則有益于漕政者改兵部欲修舉寔政又敷奏凡六條一補丁壯以寔行伍一徵折色以買操馬一增火器以固營壘一優撫馭以重巡遊一嚴捕盜以翼都會一稽職守以肅官常此則有益于兵政者後因快船得所以處而欲議及于黃船也又遵明詔陳十事一曰分大小黃船之差二曰減太常官之差三曰減駕船之軍額四曰處原駕之正軍五曰會計行糧之數六曰酌量應募之宜七曰議接船之銀八曰議修理之費九曰派編應詔快船十曰撥差應屬兵部此則又有益于船政者也竭盡心力知無不

爲斬無負叅贊專任以憂勞成疾卒贈太子少保卹典竝優厚

賀朝用

賀朝用字道亨行憲其別號也蜀之綿竹人幼穎異隨羣兒嬉戲時露奇質有古人取毬擊毚風稍長善詞說樂詠諧濶達不拘小節年十三從父來行伍偶督戎萬戶以法繩父乃負氣銜憤矢志業儒聞玉壘王太史之賢躡屣往從之遊太史奇之已而晉膠庠試輒先諸士七入棘闈無所遇乃循資克壬子貢四十餘矣卒業北雍暨守選凡一紀甲子歲謁選天曹

授景東衛幕人咸爲嗟惋怡然自得也蒞任甫三月  
值土目鳳繼祖之變全滇騷動撫臺呂瀾滄兵憲楊  
聞其精于數學爭招致帷幄待以殊禮凡天時地利  
軍旅之事必諮訪而後行尅期執俘不爽錙銖尋令  
督捕白崖盜盜盡得復督捕迷渡以數占之生擒巨  
盜數十輩知不可悉誅諭以大義令其自新釋之去  
於是萬經之賊聞風讐伏稱爲神明誓不犯境時與  
本道朱約所公論事不合無所婉委怒叱之卽起拜  
曰烈士雖窮壯心未已身可殺不可辱自此不復得  
爲門下吏矣經行入省下乞休會右方伯陳公大叅

公聞其賢挽留之已而試以事無不奇中二公深  
器異之適宜良尹以辜去俾往署其篆發摘奸伏若  
神江右人倪丙二商於宜良一日出不還同舍聞於  
官密占其人已殺沉屍水中顧水浩漫屍無所取  
乃禱於城隍令三日出屍至期行至水邊命善泅者  
入水探之未獲通邑人列兩岸以觀俄風雨雷電大  
作屍果浮出邑人大驚問商素所往來有楊連者其  
故交也命取其家一童子訊之具云丙二久通連之  
婢連知之不問是日丙二瞞連出亟如楊氏值連  
無可避連慚佯以棒戲敲之本無意殺之也適誤中

額死連懼事露乃三束筏繫以石寘水中非雷斷其  
筏寃不得白其聽斷皆此類旣乃聞嵎峨二尹之報  
久之始得代赴嵎峨時會平溪獠蠻構變臨安張兵  
憲呈允兩臺擬添設督捕丞其地西通沅江南接交  
趾自古蠻獠盤結之所欲擇官相度而難其人於是  
委臨安二府金河西文尹嵎峨張尹以其習知地利  
且夷人素所畏服俾叅護行事焉甫入境蠻落萬衆  
瀾漫山谷呼噪而來諸委官皆驚走蠻不問獨共扶  
昇朝用深入山藪中引寘高坐獠衆羅布岡厓惟酋  
長俯伏座前聽指揮示以某地堪爲官舍令分工刻

期刊木治土營屋一區繚以週垣其外開街道通諸  
巢箐羣酋稽首奉命不三月而門堂廨宇秩然嚴整  
遂爲城市癸酉三月遷昆明尹巡撫鄒公尤愛重之  
旣視事聽斷益神閭里毫髮之奸無所隱人共以城  
隍稱之鄉官鄧主政家蓄萬金初有一子聘顏府同  
文後子亡主政繼殞鉅業無所屬妻賈潛以帑物輸  
於顏將改適焉姪世彥訟之撫臺委官驗之沒於賈  
賄模糊復命再委朝用往一一檢斷歸於姪是時巡  
臺馬公稱爲卓異然性剛褊好直行已志不屑習時  
套嬖姍以希世好俯伏對應多不適上官意且以衛



幕拔起爲令長而被撫臺寵重人多忌嫉之者亦目  
分數窮屢以情告乞放歸終不可得每鬱鬱歎曰其  
命也夫居無何鄒公被人言而新代巡郭公與撫臺  
雅不相能嫉者乘間搆之曰賀某恃寵傲物依勢受  
賕請按之時篋衣束書行有日矣適報者止公毋行  
新院且有後命入謂鄒孺人曰數不可逃也吾年踰  
六十可入牢獄丐生耶又曰爾大數亦至奈何朝用  
狹中負氣素以廉自喜一旦被污蟻憤不可忍遂自  
引決鄒孺人哭曰夫死我義不獨生且夫先詔之矣  
亦自決初蚤歲遇異人授以神術凡人事之通塞慘

舒物理之羸絀倍覆天道陰陽之愆伏調適咸預言之尅以日時百不失一然深秘其術而一假於相以爲言故人以神相目之其將赴滇也別其署州事節判溫君而栗溫請曰先生茲遠行何以教我則應之曰祖公萬福但三日後州前有小變當流血溫君大駭徐曰勿憂非州事也越三日番人節搆爭於州前果剗刃焉幕景東時滇南大旱巡撫召之相曰須董太守至乃可言之陳公曰吾爲一省主顧不如郡侯耶對曰不然方今旱災惟雲南一府公之所轄廣矣何可占公然之促太守至熟視之曰喜可賀矣本月

二十一日戌時雲當合有微雨三更雷大鳴黎明雨如注非三寸不止至期言無一不酬公大奇之以書薦於巡臺見嵩劉公劉公見之曰吾雅不好星相無已姑視我子息乎察之曰子宮甚佳已有成名之慶公曰無妄言曰九日後佳報且至名列賢書第幾何敢妄對已而悉如其言其轉昆明也同筆硯陽宗令文君嘉謨往賀之乃酌之卮酒而語之曰兄亦遷矣何以無報文君不以爲然引其臂出檐下諦觀之曰遷則遷矣而不甚滿意其將有兔園之遊乎文君不樂而去明日閱邸報不誣其術之神也大率如是

陰秉衡

陰秉衡字振平內江人隱居潦園作文翰樓貯書千卷手不停披口不輟吟平生著述惓惓於天理人欲邪正異端之述嘗參酌朱子家禮爲陰氏慎終錄及婚禮節要鄉人呼之曰隱孟子

吳泰

吳泰井研人任湖廣監利知縣事祖母以孝聞母徐氏目盲泰以舌舐之母目復明鄉人稱爲孝子當道旌獎其門

楊惟懷

楊惟懷新都人從父宦游扶母櫬歸至三峽夜遇羣賊衆皆逃匿惟懷獨守母棺賊疑其有財欲發之惟懷以身仆柩賊殺之沉尸於水母柩得全

張時中

張時中金堂人父傑目盲旦夕躬授七箸夜必焚香籲天如此者三年偶遇醫復明及患腹脹常同卧起遍求醫藥尋亦愈父常曰吾無報汝願汝子亦如是也藍冠至城弗可守棄其妻子負其父先逃累遇賊哀求得免居喪哀慟祥禪如初起復爲清平司訓

羅天祐

羅天祐漢州人來遊長寧市若顛若狂善言人得失  
嘗隱語書鄉榜封以寄人撒棘無不驗倭人成都見  
司戶薛紱于座上而化

### 邵道人

邵道人者蜀人也至慶陽年六十餘矣道人不言凡  
所願指色授故莫究所自來然見之者卒知其異人  
也道人館於鐘樓街周家築土被衲無晝夜露坐郡  
中諸子弟少年爭來事道人道人凡所願指色授之  
諸子弟少年無不當道人意者道人喜看病病者家  
請往乃令病者張目又令其噓卽可活道人則目諸

弟子諸弟子卽置飯病者前道人出其袖中鐵尺  
飯上誦大悲呪已起尺摩病者曰瘥矣脫不活道人  
則趨而出病者家以死期請道人則出其指示日數  
如其指數然道人不取錢每歲自正月始活一人取  
其布尺裹袖裹完弗取也病者家脫有見飯飯道人  
以碗列諸案無問多少道人食之若加飯更以碗列  
之不食也若見具是草惡食道人卽喜食之曰更爲  
造美食道人則不食其見飯或雜葷物道人曰第擇  
去葷物終不欲更造也道人善飲水鄉野人聞之乎  
來請願觀道人飲水道人微笑領然之弟子前置水

道人目弟子令鄉野人自置水亦以椀列諸案無問  
多少道人飲之若冬月水水則聞道人齒間澆澆聲  
頃之肩踴面紅汗簌簌下若兩也居十餘年忽謂諸  
弟子曰吾將歸歟諸弟子曰先生福慶之人慶之人  
無敢慢先生者何遽言歸邪道人不應一日道人設  
几三層而坐其上諸弟子始悟其歸謂死也環守之  
夜有登几而伺其息者道人猶揮肱墜焉夜半霹靂  
隱隱起屋脊若戈士思馬戰鬪之聲諸弟子震懾伏  
地天明起視則道人死矣

補遺



楊訓文

楊訓文四川茂州人故元淮海書院山長遇亂不出  
乙巳年王師下楊州以儒士見留侍左右五月拜起  
居注尋遷中書省左司郎中洪武元年陞太常寺卿  
二年出知湖州三年移知汀州四年陞禮部尚書協  
陶凱理部事是歲肇舉進士命禮部尚書陶凱與前  
侍講學士潘廷堅爲會試主司至廷試又命訓文協  
陶凱提調得進士吳伯宗一百二十人號稱得人本  
年改戶部尚書

胡亨

胡亨字伯泰四川井研縣人洪武二十六年貢士除  
山東道御史靖難後丁憂復除北直隸 欽賜御製  
圖書清風御史箴丁憂復除雲南道陞陝西僉事致  
仕

梁萬鍾

梁萬鍾字天錫四川溫江縣人成化戊戌進士知仁  
和縣興利舉廢崇教厚俗斷獄明慎冤滯者多所平  
反子惠之聲浹于里巷邑人肖像祀之三原王公重  
其不造謁擢知杭州浚西湖以瀦水使旱澇有備新  
岳武穆王祠政尚寬簡陞兩浙鹽運使未逾年乞休

逆瑾特擴細事代民償逋負二千金盡鬻已產輸官  
恬不介慮年九十康強無恙課子孫相繼登科人謂  
循良之報

劉士元

劉士元字伯儒四川彭縣人正德六年進士除御史  
建言廷杖降麟山驛丞嘉靖四年起湖州府知府累  
陞副都御史巡撫貴州疏請致仕

王之臣

王之臣字敬充四川內江縣人前福建道御史王一  
言子嘉靖十四年進士由行人選廣西道御史疏論

夏貴溪調行人司正陞戶部郎中累陞福建左叅議

### 李鳳毛

李鳳毛字于翔四川彭縣人嘉靖二十九年進士由  
大明府推官選浙江道御史巡按宣大以邊功陞光  
祿少卿調南太僕致仕